

Korint Kimbi 1

Polnön Korint yeᅅgöra Kimbi mutukᅅi alök.

Jim-asa-asari

Polnön misin nup memba liliköiga indimᅅi yahöt ahöi Grik siti Korint miangörenᅅ anök. Korint mi Akaia prowinsgö siti bohonᅅi. Miangö kösohotᅅi mi (Apo 18.1-6) eka oyoᅅme. Nalö miangörenᅅ Korint mi siti keta bölökᅅi. Bisnisᅅini könaᅅi könaᅅi gwötpuk ala meget. Korint yeᅅön tandö lopionᅅ aka bem könaᅅi könaᅅi waikᅅini memba möpöseiba malget. Mönahotᅅini könaᅅi könaᅅi ala söᅅgaiget. Gwötpukᅅan serowilin aka malget.

Kimbi ki kewögöra ohoyök: Polnön misin nup memba liliköiga indimᅅi karöbut ahöi Efesus sitinönᅅ maliga tosatᅅan Korintnöhök kaba sutᅅine lömböt asuhuyöhi, miangö buzupᅅi jigetka mörök. Lömböt tosatᅅi kewö: Urumeleᅅ kambu yeᅅön deᅅda simbisembel malget (1.10–4.21), serowilin laᅅ aket (5.1-13), awanöm malmalgö könaᅅan sohayök (Boᅅ 7), tandö lopionᅅö bau nenegö goranora aket (Boᅅ 8), semön töröᅅi nenegö eᅅololonᅅ aket (11.17-34), zioz malmalgö areᅅ qahö wuatangöba ilingösönᅅ malget, kantri tosatᅅangö keuᅅi keuᅅi aonᅅit aka jiget (12-14). Tosatᅅan keu kewö jiget: “Kömugeri, yeᅅön kunbuk qahö wahötme.” (15.12-33) Korint yeᅅön kimbi kun mewöyök ohogetka Polgörenᅅ kayöhi, miangörenᅅ

qeqesi tosatnji al wanjiget, (mi 7.1; 8.1; 12.1; 16.1 mianjörenj oyoŋman).

Polnön qeqesinjini mi melenja lömbötŋinanjögö qambaŋ keu enjiba kimbi ki ohoyök. Urukalemgö keu (Boŋ 13 mi qetpuk sorokŋi. Könanjep nanŋak Korint anda enjekmamgö keunji jiba ohoyök (16.5-7).

Buk kianjögö bahönji bohonji 8 mi kewö:

Jim-asa-asari keu 1.1-9

Denja kambunji kambunji malget 1.10-4.21

Serowilin aka awanöm malmal 5.1-7.40

Urumelenjögö aka urumelenjögö kopa malmal 8.1-11.1

Urumelenj malmal aka möpömöpösei arenj 11.2-14.40

Kraist aka körek neŋön kömupnöhök wahötŋin 15.1-58

Judia urumelenj kambu yenjögöra naluk alget 16.1-4

Polgö arenji aka yaizözkök keunji tetekönji 16.5-24

¹ Kraist Jisösnönj Pol ni noholiga Anutugö jitŋanjögö dop melaimelai azi aposol akzal. Nönön urumelenj alani Sostenes yambuk tatzit.

² *Anutugörenj könagesö Korint sitinönj maljei, nönön embuk Buŋa keu eraum mötŋingöra kazal. Kraist Jisösnönj injini enjgoholiga yambuk qekötahögetka tök kutum enjiiga sarakŋi akze. Mewöyök ambazip denike yenönj gölme dop Kembunini Jisös Kraistkö qetŋi qeta köulukögetka i aka nini mohok kembu ak neŋgimakzawi, mönö körek enjögöra Buŋa Kimbi ki ohozit.

* 1:2: Apo 18.1

³ Anutu Iwinini aka Kembu Jisös Kraist yetkön mönö kalem möriam engiyohotka luainöŋ malme. Mewö.

Polnöŋ Korint yeŋgöra Anutu kewö möpöseiza:

⁴ Inini Kraist Jisösbuk qekötahöba kingetka Anutunöŋ kalem möriamŋi engiyöhi, miangöra mönö nalö dop engöra Anutuni saiwap jiba möpöseimakzal. ⁵ Inini Kraistpuk qekötahöba kingetka nup memegö mötmöt kalemŋi kelenmalelen engiiga mötmöt könani könani buŋa qem aŋguba ölop Buŋa keugö könani pakpak jimakze.

⁶ Nini Kraistkö könani nangöba jiinga keu miangö ölnan ahuba köhöii kinjeangö dop mötmöt kalem pakpak mi engiyök. Miangöra Anutu möpöseimakzal. ⁷ Miangöra nup memegö mötmöt kalem kungöra qahö osiba kinda Kembunini Jisös Kraistnöŋ kunbuk asuhumapköra mambörakze.

⁸ Kembunini Jisös Kraistnöŋ mem köhöim engiiga nalö teteköŋe aukŋe asuhumawi, nalö miangören inini solanŋi aka keuŋi qahö kinda i ekŋe. ⁹ Anutunöŋ keuŋi törörök wuatangöba bauköm engimakŋa. Yanön inini nanŋi Nahönŋi Jisös Kraist Kembuninambuk toroqeba malmegöra engoholök. Mewö.

Könagesöŋinan denŋa kambuŋi kambuŋi ala kinje.

¹⁰ O urumelen alaurupni, nöŋön Kembunini Jisös Kraistkö qetŋe kewö uru kuŋgum engizal: Inini mönö körekŋanök urumohot aka sutŋine jujul kude aka malmemö, uruŋi mindirigetka mohot aiga mötmöt mohot wuatangöba malme. ¹¹ O urumelen alaurupni, inini sutŋine aŋgururuk gwötpuk aka

maljei, mianğö buzup keuñi ambi Kloegö saiwaurup tosatñan mönö jigetka möral.

¹² *Kewögöra mi jizal: Engöreñök tosatñan kewö jimakze, “Neñön Polgö keuñi wuatangömakzin.” Tosatñan “Neñön Apolosgö keuñi wuatangömakzin,” jimakze. Toroqeba tosatñan kewö jimakze, “Neñön Pitögö keuñi wuatangömakzin.” Dumñe kunbuk tosatñan kewö jimakze, “Neñön mönö Kraistkö keuñi wuatangömakzin.” ¹³ Kraistnöñ jula gwötpuk ahök me? Pol nöñön mönö engöra aka maripomnöñ kömuyal me? Pol nöngö qetne o melun mem engiget me? Mewö möt sohobepuk?

¹⁴ *Nöñön engöreñök Gaius aka Krispus o melun mem etkialmö, tosatñi mi qahö mem engialangöra “Anutu saiwap!” jizal. ¹⁵ Mianğöra “Polgö qetñe o melun mem nengiget,” kunñan keu omanji mewö jibapuk.

¹⁶ *O ölña, Stefanas aka yañgö saiwaurupñi mi mewöyök o melun mem engialmö, yengö andöñine kun o melun mem wañgial me qahöpto, mi törörök qahö mötzal. ¹⁷ Kraistnöñ ni ambazip o melun mem engimangöra aka qahö melaim niñgiyökmö, Ölöwak Buña jim sehimangöra jiiga anda kamakzal. Kraistnöñ nengöra aka maripomnöñ kömuyöhi, nup mianğö ösumñan eta omanji akapuk. Mianğöra Buña keu mi gölme azigö mötkutukutu qakñe lañ qahö jimakzal. Mewö.

Kraistnöñ Anutugö kukösumñi aka mötmöt areñi indelök.

* 1:12: Apo 18.24 * 1:14: Apo 18.8; 19.29; Rom 16.23 * 1:16: 1 Kor 16.15

18 Ambazip könöp siagö buñaya akñei, yeñön maripomñanğö Buña keuñi möta mianğöra mötket uruqahö keuya akza. Mewö akzapmö, Suepkö buñaya akzini, neñğöra keu mianğön mönö Anutugö kukösumñi indeli mörakzin. 19* Mianğö keuñi Buña Kimbinöñ kewö ohoget ahöza, “Nöñön mötmöt ambazip mötkutukutuñini köndenbiga sohoma. ‘Möt asarim yakömakzin,’ jimakzei, yeñgö mötmötni mönö mem sohobiga söroräuba omanı akña.”

20 *Mötkutukutu ambazip ölni mi denike malje? Buk oyonđa mötmötkö könañi miwikñaigeri, mi denike? Gölmenöñ jitnakölikö böhi aka keu melenqelenđa jimakzei, mi mönö ölna qetpuk akze me? Gölmenöñ mötkutukutu ketanı ahözawi, Anutunöñ mönö mi mem kaheiiga (sahahaiiga) uruqahö mötmöra akza. Keu mi ölna.

21 Anutunöñ nanñi mötkutukutuñanğö dop gölmenöñ malmalgö arenı alökmö, ambazipnöñ nanñini mötkutukutuñine nanğöba mewö mianğön Anutugö könañi möt kutubingö osiba tönpin malget. Osiba mala Kraistnöñ maripomnöñ kömuyöhi, mianğöra “Uruqahö keuya!” jiba mötketmö, Anutunöñ Buña keu mi neñön jim sehibingöra jiyök. Mi jim asariinga denike yeñön uruñini melenđa möt narizei, mi dom-amöt qem enğimamgö möri dop kölök. 22 Juda yeñön aiwesök anğöletot asuhumegöra kapan kölakzemö, Grik kantri yeñön mötkutukutuñinan sehimapköra jarumakze.

* 1:19: Ais 29.14 * 1:20: Job 12.17; Ais 19.12; 33.18; 44.25

²³ Mi jarumakzemö, neñön Kraist maripomnöñ qeget kömuyöhanğö Buña keuñi jim sehimakzin. Juda yeñön keu mi mötketka uruñini bölüiga mianğöreñ qaköba uruñini qahö melenmakze. Kian kantri yeñön mianğöra mötketka uruqahö keuya akza.

²⁴ Gwötpukñan mewö mötzemö, Anutunöñ neñgoholi urunini melenñini, neñğöra Kraistnöñ mönö Anutugö mötkutukutuñi indela Anutugö kukösumñi neñgimakza. Juda me kantri tosatñi akzini, mi töndup Kraistpuk qekötahöba kinda mohot akzin.

²⁵ Ambazip neñgö mötkutukutunini aka ösumnini mi eretñi. Anutunöñ uruqahö akawak, mianğön mönö töndup ambazip mötkutukutunini oñgita öngöngöñi ketañi akawak. Anutunöñ lölöwöröñi akawak, mianğön mönö töndup ambazip ösumnini oñgita köhöikñi kötökñi akawak.

²⁶ Urumelen alaurupni, nanñini könañini denöwö ahöiga Anutunöñ enggoholöhi, mi mötmöriget? İñini gwötpukñan gölmegö mötkutukutu ketañi qahö memba malget. Gwötpukñan kukösum qakñe sukinapñinambuk qahö malget. İwiurupñini gwötpukñan qetbuñañinambuk qahö malget. ²⁷ Mewö qahöpmö, gölme ambazipnöñ engöra mötketka uruqahö ambazip omanñi akzei, Anutunöñ mönö İñini mewöñi möwölöhöm engiyök. Gölmegö mötmöt ambazip ipñi mi gamu qem engiyök. Gölme ambazipnöñ engöra mötketka lölöwöröñi akzei, Anutunöñ mönö İñini mewöñi möwölöhöm engiyök. Gölmegö kukösum ambazip ipñi mi gamu qem engiyök.

28 Gölme ambazipnön jijiwilit ak engiba könañinaḡöra mötketka etqeḡeñi akzei, Anutunön mönö inini mewöñi möwölöhöm engiyök. Gölmenön yuai akzei, yengö qetbuñañini mem solanii qahöwakḡapköra yuai kun qahö akzei, mönö mi möwölöhöm engiyök.

29 Kunön Anutugö jemesoholḡe sileni memba öḡöbapuköra mönö mewö meköba möwölöhöm engiyök. 30 Anutunön nam köl engiba enḡuaḡiriga Kraist Jisösbuk qekötahöba mal köhöimakze. Yañön Anutugö mötkutukutuñi qainñi kun indeli mörakzin. Kraistnön sohopnini memba keunini jim teköi solaniba maljin aka tök kutum neḡgiiga sarakñi akzin. 31 *Buña Kimbinön keu kewö ohoget ahöza, “Kunḡan sileni memba öḡömwawi, yañön mönö Kembu möt waḡgizawaḡöra aka sileni mem öḡöma.” Keu mianḡö dop ahinga dop köлма. Mewö.

2

Kraist maripomnön kömuyöhaḡö keuñi jial.

1 Urumelen alaurupni, nöñön engöreñ kaba Anutugö könañi naḡöba jim asarim engiali, mi keuni nahöm sorokḡambuk akḡapköra qahö jiba malal me gölmegö mötkutukutu öḡöḡöñi kon-dela mianḡön sileni qahö memba öḡöba malal. 2 Nöñön engö sutḡine mötmöt murutñi pakpak göraḡe ala Jisös Kraistkö keuñi aka maripomnön kömuyöhaḡö könañi miyök möt kutuba mi jim sehiamḡö keu jöhöyal.

* 1:31: Jer 9.24

3 *Keu mewö jöhöba engören kayali, nalö miangören azi lölöwöröni aka jönömni gwötpuk undui kenğöt qakne malal. 4 Nöñön Buja keu jim asarim engiali, mi mötkutukutu ketanğö kelök keuñi qahö jiba malal. Mi qahöpmö, Uña Töröñan sölölohöm engii ösum-mumuñan uruñine inahömapkora kapañ köla jiba malal. 5 Gölme ambazipkö mötkutukutuñinan qahöpmö, Anutugö kukösumñan nam köl engiiga möt narimegöra kapañ köla malal. Mewö.

Uña Töröñanğö mötkutukutu mi qainñi kun.

6 Nöñön töndup urumelen alaurup aködamunñinambuk maljei, yeñgö sutñine tatpiga Anutugö mötkutukutuñi gegeñi mi ölop eraum mörakzin. Gölmeğö mötkutukutuñi mi qahö eraum mörakzin. Gölmeñi gölmeñi galöm köl engiba malgetka kukösumñinan qahöwakñawi, yeñgö mötkutukutuñini mi mewöyök qahö eraum mörakzin.

7 Mi qahöpmö, Anutugö mötkutukutu tölapñi mönö mi eraum mörakzin. Anutunöñ Suep gölme qahö miwikñaim etkiiga miangören mönöwök qeljiñe lök areñi kewö ala jöhöyök, “Ambazipnöñ bian ahuba aködamun miwikñaiba oyaenköyaen akñegöra mönö mötkutukutuñi qainñi kun mi engiman.” Mewö jiba tölapñe ali ahöyök. 8 Gölmeğö azi kembuñi kembuñi mala kotkeri, yeñgörenök kunñan mönö mötkutukutu mi qahö möt kutuyök. Mi möt kutubeak ewö, Kembunini asakmararañambuk i mönö maripomnöñ qahö

* 2:3: Apo 18.9

qegetka kömumbawak. ⁹ *Mötkutukutu qainni kun
mianğöra keu kewö ohoget ahöza,

“Kunñan yuai mi je kezapñan qahö eka mörök.
Mianğö mötmötñan kungö uruñe qahö
asuhui mörökmö, ambazip Anutu uruñinan
jöpaköm wañgimakzei, yeñğöra mi mönö
mözözömgöiga jöjöröba ahöza.”

¹⁰ Gölme ambazip yuai mi qahö möta jipjap
malgetmö, Anutunöñ mi mönö Uñañi melaiiga
neñğöra indeli mörin. Yañön keu pakpakö könañi
jaruba miwikñaimakza. Anutugö mötmöt gegeni
mewöyök möt teközawañön mönö mi sölölohöm
neñgiiga mörin.

¹¹ Kungö uruñi kunöñ qahö mötza. Uruñangö
uñañi yañönök mönö mi möt yaköza. Mewöñanök
Anutugö uruñi mi kunñan qahö mötzapmö, Anutu
nanñi Uñañi Töröñi yañönök mi möt yaköza.

¹² Neñön gölmegö ahakmeme bölöñangö ömeñi
kun qahö buña qem anğuinmö, Anutunöñ yuai
kalem neñgiyöhi, mianğö könañi mötpingöra mönö
nanñi Uñañi melaii urunine geiga maljin.

¹³ Mianğö könañi gegeni tokoba eraum mörakzin.
Gölme ambazipnöñ mötkutukutuñinanğö qakñe keu
kusum neñgigetka mianğö dop mi qahö eraum
mörakzin. Mewö qahöpmö, Uña Töröñan keu
kusum neñgiyöhi, mianğö dop mönö urugö keu
ölñi kewöringa sölölohöm neñgii jim asarimakzin.

¹⁴ Uña Töröñan sölölohöm neñgiiga keu mi mewö
kewötzin ewö, könañi mönö miwikñaiba möt
asaribinanğö dop akza. Mianğöra Uña Töröñan
denike yeñğö uruñine qahö mali öne lañ maljei,
yeñön Anutu Uñañangö buñañi mi möt anğön

* 2:9: Ais 64.4

kölbingö osimakze. Yeñön Buña mianğöra mötketka uruqahö keu tandök aiga könañi möt asaribingö osize.

¹⁵ Yeñön osizemö, Uña Töröñan sölölohöm neñgiza ewö, mönö keu pakpakö könañi kewöta jim teköbinangö dop akzin. Mewö akzinmö, urumelen ambazip kungö könañamñi mi gölme ambazip köreñan törörök jim teköbingö osimakze.

¹⁶*Miangö könañi mi Buña Kimbinöñ kewö ohoget ahöza,

“Kembugö urumötmötñi mi azi kunñan kun qahö mörök.

Miangöra kunñan i goro qambañ wañgimawañgö dop qahö.”

Kunñan mi qahö mörökmö, neñön Kraistkö urumötmötñi memba maljin. Mewö.

3

Anutugö nup meme ambazip

¹ O urumelen alaurupni, injini namande ewö Kraistpuk qekötahöba kinget. Miangöra nöñön injini gölmegö ahakmeme mötöteimakzeangö tandök malgetka Buña keu mi jim asarim enğiba sutñine malal. Uña Töröñan sölölohöm enğii maljeangö tandök ewö enğöra jimangö osiba malal. ²*Nöñön keu möt asarimeangö dop juzu onji ewö gumohom enğiba malal. Nene ölni nemingö dop qahö akerangöra keu gegeni mi qahö enğial. Nalö miangören nene ölni nemingö osiget aka nalö kewöñe mewöyök mi ölop qahö nemakze.

* 2:16: Ais 40.13 * 3:2: Hib 5.12-13

3 Injini toroqeba gölmegö ahakmeme bölöni mötöteiba malje. Injini urunöŋ mututqutut möta anğururuk aka keu jijinöŋ nonğitnöŋ gonğitpi ahakze. Mewö aketka uru silegö sihim kömbönaŋini bölöŋan galöm köl enğiiga urumelenğö kopa ambazip omaŋi yenğö tandök ahakze. 4 *Tosatŋi injini kewö jimakze, “Nini Polgö keuŋi wuatangömakzin.” Tosatŋan kewö jimakze, “Nini Apolosgö keuŋi wuatangömakzin.” Mewö mewö jiba mönö gölme ambazip omaŋan ahakzeanğö tandök aka malje.

5 Apolosnöŋ ninja akza aka Pol nöŋön ninja akzal? Niri mönö Anutugö nuwa memba maljit. Kembunöŋ nanŋik nanŋik netköra nup netkiyöhi, mianğö dop bauköm enğiziga uruŋini melenđa Kembu möt nariba malje.

6 *Nöŋön kötni kömötpiga Apolosnöŋ o memba kaba mianğoreŋ mokoyökmö, Anutunöŋ mönö meiga töhötmöriam asuhuyök. 7 Mianğöra kömöröhi, yaŋön qetŋambuk qahö akza. O mokoyöhi, yaŋön mewöyök qetŋambuk qahö akzadmö, Anutunöŋ kötuetköiga töhötmöriamŋi kota qarimakzei, yaŋönök mönö qetbuŋaŋambuk akza. 8 Mewö akzadmö, kömörakzali aka o mokomakzawi, netkön mönö dop mohot akzit. Mohot akzitmö, mi töndup töwaniri mi mönö nupniri memakzirangö dop nanŋök nanŋök membit.

9 Netkön Anutugö nup neŋakyahötŋi aka yambuk nup memakzit. Enğö uruŋini mi Anutugö arö ewö aiga kölkömöt nupŋi mianğoreŋ memakza.

* 3:4: 1 Kor 1.12 * 3:6: Apo 18.4–11.24-28

Anutunöŋ miri ewö uruŋini inahöba mindirim enŋiiga köhöiba wahörakze. ¹⁰ Anutunöŋ kalem möriam niŋgiyöhi, nöŋön mianŋö dop miri memegö mötmöt azi ewö aka Anutugö tandö kömbönaŋi uruŋine kuŋguba kömötpiga kunöŋ mianŋö qakŋe miri memakza. Ölöp memakzapmö, mohot mohot neŋön mirigö nupŋi ölöpŋanök membinanŋö dop akzin. Ek kutuba membingöra mönö je galöm mem anŋubin. ¹¹ Urugö tandöŋi mi Jisös Kraist. Nöŋön mi lök uruŋine kömötpiga kunŋan mötnaripkö tandö kun miwikŋaimamgö osima.

¹² Tandö mohot akzapmö, mianŋö qakŋe tosatŋan miriŋini goul silwönöŋ me köt ölninambuk tosatŋi mianŋön memakze. Tosatŋan miriŋini ip kösönöŋ, tömbö bohöm sinŋan me senŋwenöŋ memakze. Siliknini mewö me mewö memakzin ewö, ¹³ urugö nupninanŋö ölnan mönö inanŋök inanŋök aukŋe asuhuma. Kembunöŋ nalöŋan kam kuŋguiga mianŋöreŋ mönö mirigö esuŋi luluŋma. Miri esuninan mönö Anutugö könöp bölamŋan asuhuiga jeba eriga ölnan aukŋe ekingö dop akŋa. Könöp mianŋön mönö mohot mohot neŋö mirininanŋö tandökŋi ölni mi esapesapnöŋ ala kewötma.

¹⁴ Könöpnoŋ jeba miri pakpak kewöt enŋiiga megetka ölninan köhöiba kinme ewö, yeŋön mönö nupŋinanŋö töwaŋi buŋa qem anŋume. ¹⁵ Tosatŋan miriŋini megetka ölninan jeba etme ewö, yeŋön mönö töwa qahöpmö, geŋmororoŋ miwikŋaime. Mi miwikŋaimemö, nanŋinak töndup Suepkö buŋaya malme. Könöp bölamnöŋ jem enŋohoiga mianŋö tandök onŋitpingö jaram tiba kök alal ewö aketka Anutunöŋ meköm enŋiiga Suepnöŋ öŋgöme.

16 *Nanñinak Anutugö Buña jike (tempöl) aketka Anutugö Uñajan uruñine maljawi, mi mötze me qahö? 17 Anutugö Buña jikenji mi kömbukñi akzawi, mianğö dop enñon sarakñi akze. Mianğöra kunñan Anutugö jike mem böliza ewö, Anutunöñ mönö i nanñi mem bölim wañgima.

18 Kunñan nanñi gölmegö mötmötñi wuatañgöba tilipköm añgubapuk. Enğö sutñine kunñan nanñañgöra möri “Gölmegö mötkutukutu öngöngöñi memba maljal,” jiza ewö, yañön mönö mutuk uruqahö aka mewö mianñon mötkutukutu ölnji miwikñaibawak.

19 *Anutunöñ gölmegö mötkutukutu öngöngöñi mianğöra möri uruqahö keuya akza. Mianğö keuñi Buña Kimbinöñ kewö ohoget ahöza, “Anutunöñ mötkutukutu öngöngöñi memba maljei, mi gwaröhöm enñiiga nanñini mötmöt imbi-imbinöñ supapköba qaköme.” 20 *Mianğö keuñi kun kewö ahöza, “Kembunöñ mötkutukutu ambazip yeñgö mötmöt areñinañgöra möri omanji akza.” 21 Mianğöra enğöreñök kunñan mönö ambazip neñgöra aka silenji memba wahötpapuk. Körek neñon mönö enğö buñaya akzin.

22 Pol, Apolos, Pitö* neñon mönö enğö buñaya akzin. Ambazip gölme dop maljini, neñon mönö körek enğö buñaya akzin. Mianğöra ölop keu mi me mi kewöta memba mewö mianñon malmalñini malme aka kömupñini kömume. Nalö kewöñe maljini, körek neñon mönö enğö buñaya akzin aka könañgep nup meme ambazip malmei, yeñon

* 3:16: 1 Kor 6.19; 2 Kor 6.16 * 3:19: Job 5.13 * 3:20: Sum

94.11 * 3:22: Pitö qetñi alanji Sifas

mönö mewöyök engö buᶇaya akᶇe. ²³ Mewö ak engizinmö, enᶇön Kraistkö buᶇaya aketka Kraistnönᶇ Anutugö buᶇaᶇi akza. Mewö.

4

Nini Kraistkö aposolurupᶇi akzin.

¹ Mianᶇöra ambazip körekᶇan mönö neᶇgöra kewö mötketka dop kölma: Kraistnönᶇ jim kutum neᶇgiiga nupᶇi memakzin. Anutunönᶇ keuᶇi tölapᶇi neᶇgiiga buᶇanini aiga galöm kölakzin. Neᶇön miri galömᶇaᶇgö tandök ewö akzin. ² Galöm yeᶇgö toninan miri yuaiᶇi galöm kölmegöra börönᶇine aljawi, yaᶇön mönö keu bohonᶇi kewö kapan köla jim kutum engimakza, “Nupᶇini mönö misila pöndaᶇ memba malme. Memburik-qemburik kude akᶇe. Mewö miwikᶇaim engibiga dop kölma.” ³ Korint enᶇön me gölmegö keu jake kungö galömᶇan ni kewöta jim teköm niᶇgibeak ewö, nönön mönö keu mianᶇöra mötpi eretᶇi kötökᶇi akza. Nanak mewöyök nani keuni qahö jim teközal. ⁴ Uruni kewöta keu kun qahö mötpiga mem lömbörim niᶇgizapmö, mianᶇöra töndup solanᶇi qahö akzal. Ambazipnönᶇ qahöpmö, Kembunönᶇ mönö nönᶇgö keuni kewöta jim teköm niᶇgimakza.

⁵ Mianᶇöra inᶇini mönö nalö kewöᶇe kungö keuᶇi kun mi kude jim teköme. Kembunönᶇ nalönᶇi ali kam kuᶇgumapköra mönö mambötme. Mamböta malgetka mianᶇöreᶇ kaba keu yuai ömukᶇe asambötket ahözawi, mi mönö asakᶇan indeliga aukᶇe asuhuma. Yaᶇön kaba ambazip urunini mem asariiga könaᶇamnini ölᶇan aukᶇe ekᶇaᶇgö dop akᶇa. Könaᶇamnini ölᶇi eka mohot mohot

kewöt neŋgiiga Anutunöŋ mönö mianğö dop nalö mianğöreŋ möpöseim neŋgibawak.

⁶ O urumeleŋ alaurupni, injini jula jakbak-öraŋböraŋ aka laŋ likeplikep aröŋda kinda qetal aŋgumakze. Mewö malbepuköra mönö Apolos niri mötmörim netkiba nanŋini imbi-imbi mosöta keu kianğö könaŋi mötme, “Buŋa keu ohoget ahözawi, mi mönö kude oŋgitme.” Keu mi mötket uruŋine ahöi tem kölgetka ölöwakŋegöra mönö kösohotniri mewö ohozal. Mi nani aka Apolos netkö könaŋamniri kewöta mötmörriba möt asarimegöra ohozal. Jujulŋinan mewö teköma.

⁷ Gölmegö kunŋan mönö qahö mem letot gihiiga tosatŋi enğoŋgita qainŋi kun akanak me qahö? Mi qahö. Yuai pakpak ahöm gihizawi, mi mönö Anutunöŋ kalem gihiiga buŋa qem aŋgunöŋ me qahö? Mi kalema buŋa qem aŋgunöŋ ewö, mönö wuanöŋgöra kalem qahöpkö tandök ewö silegi memba öŋgömakzan? Mi qahö dop kölja.

⁸ Yuai pakpak memba malbingö sihimŋi mötzei, mi mönö lök ahöm enğim teköza. Anutunöŋ Suep köweŋeyök kalemŋi kalemŋi mokom enğiiga lök simbawoŋ akze. Neŋön qahö bauköm enğiinga nanŋinak töndup mötnaripkö azi kembu tandök akze. Nanŋinaŋgöra mewö mötmörim aŋguze. O enön ölna kiŋ aketka dop kölbowak. Mewö aketka neŋön mönö mewöyök azi kembu-urupŋini aka enğö qöhöröŋine ölöp silenini memba öŋgöba ai-weliköm aŋgubinak. Nöŋön mewö akingö sihimŋi mötzal.

⁹ Nöŋön mewö mötzalmö, nanini könaŋamnini eki tandök kewö akza: Anutunöŋ aposol nini al neŋgiiga ambazip jeŋine etqeŋeŋi töhön

aka maljin. Ambazip enğuget kömumegö jim tekögeraᅅgö tandök aukᅅe anda kainga laᅅ qeta gamu qem neᅅgimakze. Yuai ehekᅅi qainᅅi kun ahinga gölme dop miengö toni aka Suep jakeni jakeni miengö pom garataᅅi miengön mönö jeᅅinan neᅅgek kutuba neᅅgehimakze.

¹⁰ Kraistköra aka uruni sohoi maljali, nöᅅgöra mewö jimakzemö, eᅅön Kraistpuk kinda mötmöt ambazip aködamunᅅinambuk akzeangö tandök akze. Nöᅅön lölöwöröᅅi akzalmö, eᅅön “Ambazip köhöikᅅi akzin,” jize. Ambazipnöᅅ iᅅini göda qem enᅅgimakzemö, nöᅅgöra mötket eriga jijiwilit ak niᅅgimakze. ¹¹ Nalö dölkewöᅅe mewöyök nenegö kömumba ogöra ak neᅅgiiga opo walᅅi jujuratᅅi löᅅgöta malinga bimmöᅅ laᅅ neᅅgugetka dum mirinini qahö mala toroqeba anda kamakzin.

¹² *Nanini böröᅅinan sileqeᅅe tandök nup memakzin. Ambazipnöᅅ laᅅ qesuahöm neᅅgimakzemö, neᅅön mönö kötuetköm enᅅgiba yeᅅgöra köulukömakzin. Sesewerowero ak neᅅgimakzemö, neᅅön mönö mi möta mökösoᅅda kapaᅅ köla maljin. ¹³ Uruqeᅅe keu töhöreᅅ jim neᅅgimakzemö, neᅅön mönö guᅅböᅅjöᅅjöᅅ qakᅅe ösoᅅnöᅅ melenᅅmakzin. Neᅅön gölmegö nesak lömᅅaᅅgö tandök ewö ahinga gölmeᅅi gölmeᅅi yeᅅön sisitnini memba andö qem neᅅgimakze. Mewö mala kota nalö dölkewöᅅe mewö toroqeba maljin.

¹⁴ Gamu qem enᅅgimamgöra keu ki qahö ohozalmö, wölböt nahön böraturupni ewö mönö goro qambaᅅ enᅅgimamgö mötzal. ¹⁵ Mötnaripkö

* 4:12: Apo 18.3

böhi 10.000 yeñön Kraistpuk qekötahöba köyan köla kusum engibeak ewö, mi töndup nöñön mönö Kraist Jisösbuk qekötahöba Ölöwak Buña jim asariba iwiñini akiga uruñini melenget. Mianğöra iwiurupñini gwötpuk qahö malje.

16 *Mianğöra uruñini kewö kuñgum engizal: Nöñön silik ahakzali, mianğö dop eñön mönö nöngö silikni mi wuatangöba malme. 17 Nöñön silikni Kraist Jisösbuk qekötahöba aka memba gölmeñi gölmeñi liliköba urumelen könagesö dop kusum engimakzali, mianğöra mönö ölum engubapuk. Nöñön mianğöra aka wölböt nahöni Timoti melaibiga engöreñ kama. Yanñön nömbuk pöndañ mala Kembubuk qekötahöba kinda kaba könañamni jiba köl gulim engima.

18 Engöreñök tosatñan nöñön engöreñ qahö kabilenjak ewö möta silenini möpöseiba jakbak-örañbörañ aka lañ malje. 19 Mewö maljemö, Kembunöñ sihimñan ni kamangö mötma ewö, mönö ösumök engöreñ kamam. Kamami, nalö mianğöreñ jakbak-örañbörañ ambazip yeñgö kukösumñinangöra qesim engibiga jim miwikñagetka mötmam. Silenini memba wahöta keu ketañi ketañi lañ jimakzei, mianñön nöngöreñ eretñi akza. 20 Anutugö bemtohoñ mi keuyök jijigö yuaia qahöpmö, ölni mi Anutugö kukösum. Mianñön mönö nam köl neñgiza.

21 Mianğöra uruñini qahö melenđa lañ malme ewö, nöñön mönö kömbin memba kaba keunöñ engohotirimam. Uruñini melenme ewö, mönö

* 4:16: 1 Kor 11.1; Fil 3.17

urubönjöh qakne urukalem ak engimangöra kamam? Keu yahöt mi kewöta nöngöra sihimñini denöwö mötzei, mi möt kewöta jime. Mewö.

5

Kunöñ serowilin ahöhi, i mönö sutñineyök közölme.

¹ *Keu kun kewö jigetka nöngö kezapne geyök: Tosatñan urumelen könagesö sutñine serowilin ahakze. Kunñan iwiñangö anömñi memba malja. Serowilin mewöñi mi urumelenkö kopa ambazip yengö sutñine mewöyök kun qahö ahöza. ² Kunñan mewö aiga inñi töndup silenini memba öngöba lañ jakbak-orañbörañ ahakze. Mi qahö dop köljamö, silikñangö wösöbirikñöh mönö mem kömum engiiga dop kölbawak. Mewö aka ölop azi siñgisöndok mewö ahöhi, i mönö sutñineyök közölgetka yaigep etma. I denöwö aka qahö közöljeje?

³ Nöñön ölna engöreñök köröwen malbi sileni qahö nehakzemö, töndup uñanan mönö embuk maljal. Kunñan ahakmeme kanjamñambuk ahöhi, nöñön lök yangö keuñi kewöta sutñine maljalangö tandök möta jim teköba kewö jizal: ⁴ Inñi mönö Kembunini Jisösgö qetne totoko algetka nöngö uñanan embuk toroqeiga Kembunini Jisösgö kukösumñan nam köl engiiga öröröh kinda keuñi jiba mönö kewö jöhöme: ⁵ Satanöh silenangö sihim kömbönañi bölöñi qei etmapköra mönö andö qem wañgiba yangö böröñe algetka mindiñgöm wañgima. Mindingöm wañgiiga löwöriba uruñi

* 5:1: Dut 22.30

meleni Anutunöŋ amöt qem wanğiba Kembugö nalöŋe uŋaŋi meköiga Suepkö buŋaya akawak.

⁶ *Sileni memba öŋgömakzei, mi ölöŋŋi qahö. Inini keu yahöt ki möt yaköze, “Yist kitipŋi moröŋi obuk mindiriba pluanöŋ alinga mem qariiga diŋ kokolak qemakza. Mewöyök bau wösö kömbukŋan tiŋgirakzawi, mianöŋ mönö busu pakpak mem bölimakza.”

⁷ *Keu mianğö dop inini lök plaua diŋ sarakŋi ewö aketmö, siŋgisöndökö yistŋi kun mi ket ewö sutŋine kaŋgota eŋgöhömakza. Körek bölibepüköra mönö yistŋini walŋi mi kewöt uteköme. Azi mi wösö kömbuk ewö közöla mönö dumŋe kunbuk yambu jeŋiqeŋe dölökŋaŋğö plaua diŋ sarakŋi ewö aka malme. Ak-kömukömu kendon nalöŋe lama jöwöwöl ohoba beret yistŋi qahö nemakzei, mianğö dop Kraistnöŋ nanine ak-kömukömu lamanini aiga lök qeget kömuyök. Mianğöra inini ölöŋ plaua diŋ sarakŋi yistŋi qahö ewö akŋe aka kunbuk oyaenğkoyaenğ uruŋe kaŋgota malme.

⁸ *Kraist kömuyöhanğöra mönö söŋŋai kendon aka malbin. Yist me wösö kömbukŋi mi ahakmeme bölöŋi inğonmaŋğonğambuk. Mianğö qakŋe mönö söŋŋai kendon kude akin. Mianğöra mönö geŋmonğ mosöta keu ölni wuatanağöba beret yistŋi qahö ewö aka mianğö qakŋe söŋŋai kendon aka malbin.

⁹ Nöŋön Buŋa Kimbi ohom eŋgiba kewö jial: Inini serowilin ahakzei, yembuk mönö kude köisirik tata eraum mötme. ¹⁰ Gölmenöŋ uruŋini qahö melenđa ahakmeme bölöŋi ahakzei, yeŋğöra

* 5:6: Gal 5.9 * 5:7: Eks 12.5 * 5:8: Eks 13.7; Dut 16.3

keu mi qahö ohoyal. Yenön serowilin aka yuaigö nepaqepalok membagun memingö köpösöngömakze. Yuai kalöpköba yongorö memakze aka tandö lopion waikñini memba möpöseim engimakze. Yengöra aka mewö ohom engibilenak ewö, injini mönö gölmenöñ malbingö osibeak.

¹¹ Yengöra aka qahöpmö, könani kewögöra keu mi ohom engial: Kunñan nanñi qetñi urumelen ala jiba töndup serowilin akza me yuaigö nepaqepalok membagun memangö kösösöngömakza me tandö lopion waikñi memba möpöseimawkawi, yambuk mönö kude köisirik tata eraum mötme. Mötnarip kambu engö sutñine kunñan mepaqepaik ahakza me o köhöikñi nempa enololon ahakza me yuai kalöpköba yongorö memakza ewö, yambuk tata nene kun kude neme.

¹² Yaigep maljei, nöñön yengö keuñini qahö jim tekömakzal. Mi nöñgöreñ nuwa qahö. Injini mewöyök könagesö pakpakö keuñini qahöpmö, uruñini melenja sel uruñe maljei, mönö yengö keuñini miyök kewöta jim tekömakze. ¹³ *Yaigep lañ maljei, Anutunöñ mönö yengö keuñini kewöta jim teköma. Miangöra mönö Buña keu kiangö dop akñe, “Azi bölöñi mi mönö sutñineyök közölme.” Mewö.

6

Urumelen alanini mi yaigep yengö keu jakeñe kude alme.

* 5:13: Dut 13.5; 17.7

¹ Urumelen ambazip sutñine kunñan alaŋi keu jakeŋe almamgö mötza ewö, yañön Anutugö ambazip sarakñi engongita ambazip gonjonji yengö jeñine aniga qahö dop kölja. Qahö! Urumelenğö kopa ambazip baukôm wangimeğöra qesim enğiiga gamuñambuk akza. ² Anutugö ambazip sarakñi neñön kantriñi kantriñi yengö keuñini kewöta jim teköbini, mi lök mötze. Inini gölme pakpak yengö keuñini jim teköbingö dop akze ewö, mönö denöwö aka keu morömorö kewöta jim tekömeanğö dop qahö akze? Inini mönö ölna miangö dop akze. ³ Urumelen ambazip neñön Suep garataurup yengö keuñini kewöta jim teköbini, mi lök mötze. Miangö dop akzin ewö, gölmenöñ malmalgö keuñi mi mönö amqeba kewöta ölop jim tekömakin.

⁴ Miangöra gölmenöñ malmalgö keuñi sutñine asuhumakzawi, keuñini mi mönö wuanöngöra silene yengö keu jakeŋe öngöba jim tekömegö qesim engimakze? Urumelenğö kopa ambazip sutñine jijiwilit ak engimakzei, yengöra töndup keu nalöŋe mötketka öngömakza. Mi qahö dop kölja.

⁵ Keu mi gamu qem engimamğöra jizal. Mötnarip ambazip engö sutñine keu ahözawi, engöreñök kungö mötkutukutuñi dop kölga keu mi ölop jim tekömawanğö dop akza me qahö? Mönö ölop sutñineyök azi mewöñi miwikñaime. ⁶ Qahö tandök aiga urumelen ala kunöñ alaŋi silene yengö keu jakeŋe alakza. Mewö ala ambazip Anutu qahö möt narizeï, mönö yengö jeñine anda keu nupköra qesim engimakza. Mi qahö dop kölja.

⁷ Sutñine keu jakeŋe al angumakzeï, mewö mi-añön mönö nanñini eta enğuiga Kraistkö qet-

buñanjan lök eretñi aiga malje. Ambazipnöñ ak bölim engigetka uruñini mianğöra wahöri keunöñ al engigetka Anutugö jene qahö dop kölja. Tilipqilip aka yuainini öröba megetka inini likepñi qahö meleş engigetka mewö mianjön Kraistkö könanjan mönö aködamunñambuk akña.

⁸ Inini Kraistkö qetñi kewö mem bölimakze: Mönö nanñinak tilipqilip aka ambazip ak bölim engiba yuainini öröba memakze. Urumeleñ alauruñini yeğöra mewöyök mewö ak engimakze.

⁹ Irimqirim ambazip yejön mönö Anutu bemtohoñanğö uruñe öngöba dum qahö meme. Mi mötze. Ahakmemenjan mönö tilipköm anğuba janjuñ akepek. Tosatñan serowilin aka tandö lopion waikñini memba möpöseimakze. Tosatñan awanöm malmal onğita qesabulum ahakze. Tosatñan monengöra lañ amimba malje aka azi nanñirök ambi nanñirök amimba malje. Mewöñi mienjön mönö Anutu bemtohoñanğö buñanji qahö akña.

¹⁰ Tosatñan yonğorö memba yuaigö nepaqepalok membagun memingö köpösönğömakze. Tosatñan o köhöikñi namba enololon aka lañ mepaqepaik ahakze. Tosatñan yuai kalöpköba yonğorö memakze. Ambazip mewöñan mönö Anutugö bemtohoñi buña qahö qem anğume. ¹¹ Engöreñök tosatñan mutuk mewö aka malgetmö, könanğep Kembunini Jisös Kraist buña qem anğugetka sepñan sanğonda tök kutum engiba yanğö qetñe sarakñi aket. Mem solanim enğıiga Anutuninanğö Uñanjan mönö inahöm enğıiga diñgiba malje. Mewö.

Sileñinan Anutugö jike kömbukñi akza.

12 *Nöñön yuai pakpak ölop memamanğö dop akzalmö, yuai pakpaknöñ mönö qahö mem ölöwak niñgiza. Yuai pakpak ölop memamanğö dop akzalmö, yuai kunöñ kembu ak niñgibapuköra mönö galöm mem anğumakzal. 13 “Nene mi neneyök. Mi kömoñgokninanğöra aka ahöza. Kömoñgoknini mi nene nein gemapköra aka ahöza.” Kunöñ mewö jibawakmö, Anutunöñ mönö nene aka kömoñgok mi mohotje jim teköi qahöwakñahot. Silenini mi serowilin akingöra qahöp mö, Kembugö nupñi membingöra aka ahöza. Mewö ahöiga nanñak silenini ölöwakñapköra nene yuai neñgimakza. 14 Anutunöñ nanñi kukösumñan Kembu mem gulii kömupnöñhök wahöröhi, yañön mönö nini mewöyök mem gulim neñgii wahötpin.

15 Enğö sileninan Kraistpuk toroqeba silenanğö kitipñi akzei, mi mötze me qahö? Mianğöra nöñön Kraist silenanğö kitipñi kun memba köna ketanji ambibuk qekötahömam me qahö? Mi qahöpmahöp! Mönö yapmakek! 16 *Anutunöñ keunji kewö jii ahöza, “Yetkөн mönö sile mohot akñahot.” Mianğöra kunñan köna ketanji ambibuk qekötahözawi, yañön mönö yambuk sile mohot akñahot. Mi mötze me qahö? 17 Mohot akñahotmö, kunñan Kembubuk qekötahözawi, yanğö uñañan mönö Kembugö Uñañambuk mindiriiga mohok aka malmahot.

18 Serowilin mi mönö misinğöba mosötme. Sinğisöndok tosatñi mi me mi ahakzini, mi pakpak mönö sileninanğö yaigepñe asuhumakza. Kunñan serowilin ahakzawi, yañön mönö nanñi silenji

* 6:12: 1 Kor 10.23 * 6:16: Jen 2.24

mem böliba siŋgisöndok ahakza. ¹⁹ *Silenjanan mönö Uña Töröŋaŋgö Buña jikenji (tempöl) akza. Anutunöŋ Uñaŋi enjiiga buña qem anjugetka uruŋine malja. Miangöra nanŋini buñaya qahö akzei, mi mötze me qahö?

²⁰ Nanŋini buñaya qahöpmö, Kraistnöŋ söŋgörüŋini ketanjan bohonŋini meiga yaŋgö buñaya akze. Miangöra silenjanan mönö ahakmeme sarakŋi aketka Anutugö qetbuñajan sehimakŋa. Mewö.

7

Awanöm aka gwabö seram malmal tatat

¹ Injini keu tosatŋi ohoba qesigeri, mi jim asarimam. Azinöŋ ambi qahö memba gwaböya maljawi, mi ölop. ² Mi ölopŋi akzapmö, silegö sihimŋan sero yonŋorö akepuköra injini mohot mohot mönö nanŋik nanŋik awanöm amemba malme. ³ Azinöŋ mönö anömŋaŋgö sihimŋaŋgö dop awanöm malmalgö arenji wuatangöma. Anömŋan mewöyök mönö apŋaŋgö sihimŋi wuatangöba malma.

⁴ Anömŋaŋgö silenjan mönö nanŋi buñaŋi qahö aiga nanŋök mi qahö galöm kölakzapmö, apŋan mi galöm kölakza. Apŋaŋgö silenjan mewöyök nanŋi buñaya qahö aiga nanŋanök qahö galöm kölakzapmö, anömŋan mi galöm kölakza. ⁵ Miangöra nanŋiri mönö kude anŋön köl anŋuba malmahot. Nanŋirök urumohot aka pöndaŋ köuluk nup membitköra ölop nanŋök nanŋök malmahotmö, nalö tosatŋi mewö malagun mönö kunbuk mindiriba mohotŋe malmahot. Uruŋiri ölop qahö galöm

* 6:19: 1 Kor 3.16; 2 Kor 6.16

kölohotka Satanöŋ esapköm etkiiga siŋgisöndoknöŋ etpahotpuköra mönö mewö aka malmahot.

⁶ Mewö akŋahotköra ölop jizalmö, jöjopaŋ keu mewöŋi mi qahö al enġizal. ⁷ Nöŋön ambazip körek pakpak ni ewö gwabulum malmegöra mötzalmö, iŋini tosatŋi Anutugö nup memegöra mötmöt kalem mewöŋi mi qahö memba malje. Anutunöŋ mötmöt kalemŋi mendenŋiga mohot mohot neŋön mi me mi nanŋök nanŋök buŋa qem aŋguba maljin.

⁸ Awanöm qahö aka malö maljei, enġöra kewö jizal: Enŋön ni ewö toroqeba awanöm qahöpmö, solanŋi malmei, mi mönö ölopŋi akza. ⁹ Ölopŋi akzapmö, awanöm akingö uruŋini könöp jeiga malbepuköra mönö ölop awanöm aketka amqema. Miaŋgöra yeŋön uruŋini galöm kölbingö osize ewö, mönö ölop awanöm akŋe.

¹⁰ *Awanöm maljei, enġöra kewö jim kutuzal, nöŋönök qahöpmö, Kembunöŋ nanŋak mönö keu ki jiza: Anömŋan apŋi kude mosötma. ¹¹ Mewö jizapmö, töndup apŋi mosötma ewö, mönö azi kun kude memba öne malma me apŋambuk kunbuk eraum möta urumohot aka malmahot. Mewöyök apŋan anömŋi kude mosötma.

¹² Mi Kembugö keuyapmö, awanöm tosatŋi enġö goronŋi mi Kembunöŋ qahö jizapmö, nanak mi kewö jizal: Urumelenŋ azi kungö anömŋan uruŋi qahö melenġa töndup yambuk malmamgö mötzawi, yaŋön mönö anömŋi mi kude mosötma. ¹³ Mewöŋanök urumelenŋ ambi kungö apŋan uruŋi qahö melenġa töndup yambuk

* **7:10:** Mat 5.32; 19.9; Mak 10.11-12; Luk 16.18

malmamgö mötzawi, yañön mönö apñi mi kude mosötma. ¹⁴ Miangö könañi kewö: Kungö apñan urumelenğö kopa azia aiga Anutunöñ i tondup urumelenğ anömñi qekötahözawañğöra aka tök kutum wañgiiga sarakñi akza. Mewöñanök kungö anömñan mötnaripñi qahöpmö, urumelenğ apñi qekötahözawañğöra aka Anutunöñ i tök kutum wañgiiga sarakñi akza. Kunöñ sarakñi qahö akawak ewö, nahönböratñiran mönö Anutugö sel yaigepñe malbeak. Mewö malbeakmö, Anutunöñ mohotñe tök kutum enğiyöhañğöra mönö sarakñi akze.

¹⁵ Sarakñi akzemö, kunñan qahö möt nariba apñi me anömñi mosötmamgö mötza ewö, mönö ölöp mosötma. Mewö asuhuiga nöñgö keunan urumelenğ alanini mi qahö jöhöma. Anutunöñ inñini luainöñ malmegöra enğoholök. ¹⁶ Ambi, gi apki uru kuñgum wañginöñga uruñi melenğma me qahöwi, mi mönö denöwö mötpanak? Me azi, gi anömgi uru kuñgum wañginöñga uruñi melenğma me qahöwi, mi mönö denöwö mötpanak? Mianğöra mönö luainöñ malme. Mewö.

Anutunöñ enğoholöhañğö dop mönö toroqeba malme.

¹⁷ Kembunöñ mohot mohot enğö malmalñini areñ aliga awanöm me solanñi malgetka Anutunöñ enğoholöhi, mianğö dop mönö toroqeba mala malmalñinañğö könañi kude uteköme. Urumelenğ könagesöñi könagesöñi liliköba miri dop mewö jim kutum enğimakzal.

¹⁸ Anutugö aiwesökñi azi kungö silene yañdiget maliga mewö oholök ewö, mi mönö kutumamgö kude kapanğ kölma. Anutugö aiwesökñi kungö

silenje qahö yandiget maliga mewö oholök ewö, mönö mi yandimegö kude kapan kölma. ¹⁹ Anutugö aiwesökni silenine yandiget ahöza me qahöwi, mianön Anutugö jeje yuai omani akzapmö, jöjöpan keuji tem köla wuatangöinga ölni akza.

²⁰ Anutunöñ engoholiga nalö miangören awanöm me solanji malgeri, injini mohot mohot mönö miangö dop toroqeba malme. ²¹ Kungö welenqege omani aknönga Anutunöñ goholök ewö, miangöra mönö waimanjat kude aka malman. Urugi melennda ölop solanji aka nup kun miwikñaibanak ewö, mi mönö ölop miwikñaيمان me urugi amqeiga ölop toroqeba welenqege omani malman.*

²² Mi kewögöra: Kunöñ welenqege omani aiga Kembunöñ mewö oholi uruji melenniga sinjisöndokñangö kösöni pösariga solanji aka malja. Mewöñanök kunñan solanji aiga Kembunöñ mewö oholi uruji melenniga nanji imbi-imbi qahöpmö, Kraistkö jitji tem kölmapkö kösönöñ kinda welenni qeba malja. ²³ Kraistnöñ bohonji ketanjan söngöröñini meiga maljeangöra mönö gölme ambazip yengö keu kengöt bapñe anda welenqegeñini omani aka malbepuk.

²⁴ Miangöra urumelen alaurupni, Anutunöñ engoholiga nalö miangören solanji kösöñini qahö me welenqege tonjanangö kösö gwarönöñ malgeri, injini mohot mohot mönö miangö dop Anutugö jeje toroqeba malme. Mewö.

* **7:21:** Keu miangö könanji kun kewö: Urugi melennda ölop solanji aka nup kun miwikñaizän ewö, gi ölop toroqeba welenqege omani malman.

Gwabö seram aka malö yeŋgö goro keuŋini

²⁵ Ambi seram jömukŋi† eŋgö goroya mi Kembunöŋ qahö jim kutui mötzal. Mianğöra Kembunöŋ ak kômum niŋgiiga keuni laŋ qahöpmö, möt nariget dop köljawanğö dop jimakzali, mönö mianğö dop kewöta nani mötmötnan kewö jimam:

²⁶ Kahasililiŋ nalöŋi dopdowizawanğöra gwabö seram maljei, körek eŋön mönö mianğö dop toroqeba malgetka ölöwakza. Mewö mötmörizal.

²⁷ Ambi memba maljan ewö, anömgi mosötmangö kude akŋan. Anömgi qahö solanŋi maljan ewö, mönö ambigöra kude jaruman. ²⁸ Töndup ambi memani, mianğön mönö siŋgisöndokŋi qahö akŋa. Mewöŋanök ambi seramnöŋ azi memawi, yaŋön siŋgisöndok qahö akŋa. Siŋgisöndok qahöpmö, mewö akŋei, yeŋön mönö sileŋinan kahasililiŋ gwötpuk miwikŋaiba mötme. Eŋön mi mötpepuköra mönö aŋgön köl eŋgimangö mötzal.

²⁹ Mewö möta goro eŋgizalmö, urumelen alaurupni, keu kun kewö jimam: Kembu kamawanğö nalöŋan törizawanğöra aka ambi memba maljei, eŋön mönö mewöyök nalö kianğoreŋök könahiba anömŋini qahö tandök ewö aka malme. ³⁰ Wösöbirik aka sahötzei, eŋön mönö qahö sahötmeanğö tandök ewö aka malme. Uruŋini ölöwahiga söŋgaizei, eŋön mönö qahö söŋgaimeanğö tandök ewö aka malme. Yuai bohonŋi mezei, eŋön mönö mi qahö buŋa qem aŋgumeanğö tandök ewö aka malme.

³¹ Gölmönöŋ nalö kewöŋe areŋ wuatanağömakzei, mianğön mönö ayapkômawanğö dop akza.

† 7:25: qesabulum qahö qeqeŋi

Miangöra gölmegö öröyuañi kölköl-örörö aka nupköra alakzei, eñön mönö mianñon uruñini jöhömakzawañgö tandök ewö kude aka malme.

³² Injini gölmegö lömbötköra waimanjat qahö malmegö sihimni mötzal. Awanöm qahö solanñi maljawañon mönö Kembugö öröyuaigöra waimanjat mörakza. Mi möta “Denöwö akiga Kembugö uruñan ölöwahi dop kölbawak,” nanñanğöra mewö jimakza. ³³ Mewö jimakzapmö, ambi memba maljawañon mönö gölmegö öröyuaigöra waimanjat mörakza. Mi möta “Denöwö akiga anömnañgö uruñan ölöwahi dop kölbawak,” nanñanğöra mewö jimakza.

³⁴ Kembunöñ likep anömnañ likep mötmötñi öröyohotka urudenñeñ aka malja. Mewöñanök ambi apñi qahö aka ambi seram solanñi maljahañon mönö Kembugö öröyuaigöra waimanjat mörakzahot. Mi möta “Denöwö akiga uñani aka sileni sarakñi aiga Kembugöra dop kölbawak,” nanñirañğöra mewö jimakzahot. Mewö jimakzahotmö, azi memba maljawañon mönö gölmegö öröyuaigöra waimanjat mörakza. Mi möta “Denöwö akiga apnañgö uruñan ölöwahi dop kölbawak,” nanñanğöra mewö jimakza.

³⁵ Nanñini bauköm enğimamgö möta goro mi enğizal. Mi tosatñi kösö ewö jöhöm enğibi lömböt miwikñaimegöra qahöpmö, könanñi kewögöra mi enğizal: Nöñon injini ahakmeme diñdini wuatañğöba urudenñeñ qahöpmö, pöndañ Kembubuk qekötahöba kin köhöimegöra mötzal. Miangöra goronñini mi jizal. Mewö.

³⁶ Azi kunñan ambi serambuk buña qeba malagun anğömosötpitkö mötmörizahori, yetkö

goronjiri kewö jimam: Azi mianjon kewö mötmöriba jiza, “Ambi mi memba mewö törörök qahö ak wangibilejak.” Mewö juiga ambi memawangö sihimnji möt köhöiiga ambigö yambuñi azi memegö dop akza ewö, yanjon mönö ölop sihimnangö dop aiga ameyohotka dop kölma. Mewö mianjon singisöndokjiri qahö akña. ³⁷ Qahö akñapmö, azinon ambi mi qahö mapkö keunji nanji urunan johöba möt köhöizawi, mianjora kewö jimam: Kunjan azi mi kungui qahö qaközapmö, ölop nanji sihimnangö dop wuatangöba keunon qahö johöi ahakza ewö, yanjon mönö ölop sihimnangö dop aka ambi mi qahö mema.

³⁸ Mewö aiga ambi seram mezawanon mönö dopne akzapmö, i qahö mezawanon mönö köna ölop sorokni wuatangöba törörök akza. Mewö.‡ (v 37b) Qahö akñapmö, iwinan boratni azi qahö wangimapkö keunji nanji urunan johöba möt köhöizawi, mianjora kewö jimam: Kunjan iwi mi qahö kungui qaközapmö, ölop nanji sihimnangö dop wuatangöba keunon qahö johöi ahakza ewö, yanjon mönö ölop sihimnangö dop aka boratni anjon kölma. (v 38b) Mewö aiga borat seramni azi wangizawanon mönö dopne akzapmö, i qahö wangizawanon mönö köna ölop sorokni wuatangöiga törörök akza. Mewö.

‡ **7:38:** 36b Azi kunon boratni azi wangimangö urayahöt mötzawi, yangö goronji kewö jimam: Iwinan kewö mötmöriba jiza, “Boratni wangiba mewö törörök qahö ak wangibilejak.” Mewö juiga boratnangö yambuñi azi memegö dop aiga azi wangimangö sihimnji möt köhöiza ewö, yanjon mönö ölop sihimnangö dop aka mosoriga azi meiga dop kölma. Iwinan mewö mianjon singisöndok qahö akña.

39 Ambinöŋ apŋan jebuk malmawangö dop amöamögö keuŋan jöhöi maljapmö, apŋan kömuma ewö, keu mianjön mewöŋanök kömuiga ölop azi sihimŋan jimawangö dop mema. Urumelengö kopa azia qahöpmö, azi Kembubuk qekötahözawi, miyök mema. 40 Ölop azi memba sösöŋgai qorembenji miwikŋaimapmö, toroqeba solanŋi malma ewö, mönö urusösöŋgai ölni miwikŋaiba söŋgaimakŋa. Nöŋön keu mi kewöta mewö jizal. Anutugö Uŋaŋan nöŋgö urune mewöyök maljawi, mianjöra mönö mewö mötmöriba jizal. Mewö.

8

Nene tandö lopiongö naluk alalŋi mi nembin me qahö?

1 Inini nene tandö lopiongö naluk alalŋi mianjöra ohogetka goro kewö jimam: Urukalemnöŋ mönö bauköm engima. Goranora jigetka tosatŋan kewö jimakze, “Körek neŋön tandö lopiongö könaŋini möt yaköinga omaŋi akza.” Keu mi ölbölŋa akza, mi mötzin. Inini mötmöt mewöŋi jiba malgetka uruŋinan wahöriga koŋaen ewö tererengöba aiwelikömakze. Mewö aka denŋa siksauk malje. Köna bohonŋi mi urukalem. Köna mewö mianjön mönö nanini urunini möhangöba mem köhöim angubin. 2 Kunöŋ “Keu kungö könaŋi möt yaközal,” mi jitnöŋ jizawi, yangö mötkutukutuŋi ölnan mönö qahö asuhuiga toroqeba tönpin malja. 3 Mi keunöhök jizapmö, kunŋan Anutu uruŋan jöpakömakzawi, Anutunöŋ mönö yangöra möri ölni akza.

4 Nene tandö lopionḡ yengöra naluk algeri, mi nembin me qahöpto? Keu kewö jimakze, “Tandö lopionḡ mi bem ölnḡ qahö maljeangö kaisöpsöpḡini akze,” aka keu kun kewö, “Anutu mohotnönḡ malja. Alaḡi kun qahö.” Keu yahöt mi ölnḡ akzahot, mi mötzin. 5 Keu mianḡö könḡi kewö, “Öme bemḡi bemḡi,” qetḡini mewö qerakzei, mi gwötpuk malje. Suepnönḡ me gölmenönḡ maljei, mi ölop qahö mötzin. Ölnḡ ömewöröme, bem aka azi kembu mi gwötpuk malje.

6 Mi maljemö, mi töndup Anutu mohot yaḡönök nanini bemnini aka Iwinini akza. Yaḡön yuai pakpak miwikḡaii asuhuyök. Malmalnini yaḡöra malbingöra aka al nenḡii maljin. Mewöyök Kembu mohot Jisös Kraist malja. Yaḡön Anutu bauköiga yuai pakpak miwikḡaiyohot. Nini mewöyök bauköm nenḡiiga mal köhöimakzin.

7 Mewö möt narizinmö, ambazip körekḡan mönö mötkutukutu mewönḡi mi qahö memba malje. Mi qahöpmö, tosatḡan mutuk tandö lopionḡ waikḡini memba möt köhöigerangöra aka dölkewöḡe mewöyök toroqeba nene tandö lopionḡö naluk alalḡi mi memba mewö mianḡön amqeba bemurup mi mötmöriba malje. Uruḡinan lölöwörönḡi aiga uruyahöt aka negetka uruḡinan mianḡöra tölöhomakza. 8 Tölöhomakzapmö, nenenönḡ nenḡuangita Anutu kösutḡe qahö al nenḡimakza. Nene sinḡi malbini, mewö geḡmororonḡ qahö miwikḡaibin. Nene memba malbini, qetbuḡaninan mewö qahö qarima.

9 Mi töndup nene pakpak nembangö amqezei, eḡön mönö jaubatbat laḡ malbepuköra galöm

mem anguba malme. Mewö malgetka tosatjan engeka uruñinan lölöwörö aka bölii et engubapuk.

¹⁰ Miangö könani kewö: Göñön mötkutukutu ölni memba mala amqeba tandö lopion jikeñe anda tata nene nenönga alagi kunjan gehi kewö lömbörima: Uruñan lölöwöröni aiga uruyahöt akzawi, yañön mewö geke uruñan wahöri amqeba nene tandö lopiongö naluk alalni mi nempa et qebawak.

¹¹ Göhö mötkutukutugi ölni mianjön mönö nangi urumelen alagi kunguiga uruyahöt qakñe lölöwöröni akzawangöra mönö amqeba nempa et qebawak. Kraistnöñ yangöra aka kömuyökmö, nene mi nempa mewö et qeba ayuhuiga qahö dop kölma.

¹² Ayuhumapmö, urumelen alaurupñini mewö mem bölim engiba uruñini lölöwöröni mi qeba köndenja singisöndok ahakzei, mewö mianjön mönö Kraist nanñi qetala singisöndok ahakze.

¹³ Miangöra nöñön nene kun nembiga mianjön urumelen alani kölgrom wañgiiga et qeba singisöndok akza ewö, nöñön mönö nalö kunöñ nene mi qahö toroqeba nemam. Nöñön alani jölöngöba kölgrom wañgibileñbuköra kapan köla kinjal. Mewö.

9

Aposol denöwö akiga dop kölbawak?

¹ Wani kösönöñ jöhöm niñgiiga solanñi qahö ak-ilenjak? Enjön kewöt niñgigetka aposol akzal me qahö? Kembunini Jisösnöñ asuhum niñgiiga ehal

me qahö? Nöñön Kembangörej nangöba nup membiga injini nup miangö ölni akze. ² Kembangörej nanjak aposol nup ningii yambuk kinda membiga injini uruñini melennda nöngö mungem supapni akze. Miangöra tosatñan kewöt ningigetka aposol qahö akilenjak ewö, eñön mönö könañamni mewö möt yaköze. Mi mönö amqeba nangöba jigetka dop kölma.

³ Ambazip tosatñan nöngöra “Aposola qahö akza,” jiba tokoba andönöñ qeçe ak ningimakzemö, nöñön mönö engörej kösohot jiba mianön nani könañamni nangöba jimakzal. ⁴ Miangöra könöp numbu nene ningigetka neñakurupni yembuk memba nempa malbinak, mianön mönö dopñe akawak. ⁵ Pitö, aposol tosatñi aka Kembu Jisösgö munurupñi yeñön anömurupñini mötnaripñinambuha enguanñita mohotñe anda kamakze. Nöñön mewöyök miangö dop akilenjak ewö, silik mianön mönö köna walönda qötöñgatpileñak me qahö? Mi qahöpmahöp.

⁶ Silegö malmalñe injini ambazip ipñi nangöm engimakzemö, ni aka Barnabas qahö. Niri töwa qahö netkigetka öne malakzit. Mi mötketka dop kölja me qahö? Tosatñan urugö nup megetka töwa engigetka silenjanñgö nup qahö memakzemö, netköröhök mönö nangönanñgöniri nanirak miwikñabitkö dop jize me? ⁷ Gawmangö yarö nup memakzei, yeñgörejök kunñan nanñi malmalñi nangöm anguba memakza me qahö? Wain nup kömörakzei, yeñön körek miangö ölni memba nemakze me qahö? Mewöñanök bulmakau galöm kölakzei, yeñön körek miangö juzu onñi nemakze me qahö?

⁸ Keu mi gölme ambazip nanine mötmötnöhök mötöteiba qahö jizal. Anutunöŋ mewöyök mönö keu miyök Mosesgö Köna keunöŋ jiza.

⁹ *Mosesgö Köna keunöŋ Juda yeŋgö nup meme silikŋini mi jim asariba kewö ohoget ahöza, “Wit padigö kötni aka kamböŋi kewötpingöra bulmakau aziŋi waŋgitketka padi kambu qakŋe tiba tözözamgömakzawi, yaŋgö numbuŋi mönö kude mözöpköme. Mewö gumohom waŋgigetka ölop nene kitipŋi neiga dop kölma.” Miaŋgö dop kiamnöŋ böröjaŋ memba sömbup meköi qeba nene kitipŋi waŋgiget neiga dop kölma. Anutunöŋ kiam bulmakau miŋgöra waimanjat qahö möta mewö jiza. Mi qahö.

¹⁰ Sömbupköra qahöpmö, keu mi mönö neŋgöra jii ahöza. Keu mi neŋön kewö akingöra aka ohoget ahöza: Kinonöŋ nup barözawaŋön mönö ölni asuhumapkö jörömqöröm qakŋe nupŋi memakŋa. Mewöyök padi dudutnöŋ qeba ölni aka kamböŋi kewötzawaŋön mönö bahöŋi memba nemapkö al mamböta nupŋi memakŋa. ¹¹ *Neŋön urugö keu kötni sutŋine qesiŋ gila malinga eŋön malmalgö naŋgönaŋgö yuai qahö neŋgigetka gamuŋambuk akza. Nöŋön mem ölöwak eŋgibiga eŋön miaŋgö likepŋi melenja niŋgigetka dopŋe akŋa.

¹² Tosatŋan sutŋine urugö nup megetka naŋgöm eŋgigetka dopŋe akza ewö, ni mönö dop mi ongita naŋgöm niŋgigetka dop kölma. Likepŋi eŋgiinga miaŋgö likepŋi neŋgigetka dop kölbowakmö, nöŋön miaŋgö dop akŋegöra qahö qesim eŋgial. Kraistkö Ölöwak Buŋa keu sehimapkö könaŋi jöhöbinbuköra

* **9:9:** Dut 25.4; 1 Tim 5.18 * **9:11:** Rom 15.27

mönö yuai nengimegöra qahö qesim engiin. Qahöpmö, naninahök mönö kapan köla köhöiba lömböt pakpak bisiba malin.

13 *Keu ki mönö mötmörime: Jöwöwöl jikenöŋ nup memakzei, yeŋön mönö jike miangöreŋök numbu neneŋini memba nemakze. Jöwöwöl ohoba altagö könöpŋi galöm kölmegöra kuŋgum engigetka kinjei, yeŋön ambazip nene nalukŋini altagöreŋ algetka nene miangö kitipŋi tosatŋi mi miangöreŋök buŋa qem aŋgumakze. 14 *Keu miangö dop Kembunöŋ mewöyök jim kutuba keu kewö jiyök, “Ölöwak Buŋa jim sehigetka ambazipnöŋ mötmei, yeŋön mönö Ölöwak Buŋagö likepŋi kötön naluk algetka malmalŋinangö nangönanŋöŋini miwikŋaiba malme.”

15 Nöŋön ölop keu miangö dop mötmöriba urugö nup memba töwa niŋgimegöra qesim engibileŋakmö, kötön naluk almeangö keu pakpak mi mönö mosöral. Moner almeangö keu ohozali, mi eŋön mewö ak niŋgimegöra aka qahö ohozal. Töwa memangö mötmöribi lömböriiga kömukömugö mötpiga anŋeza. Nanangöra mi keu omaŋi qahöpmö, töwa qahö niŋgimegö keuŋi mi mönö sileni möpöseiba jizal. Nöŋgöreŋ keu mi kunöŋ kun qeapkömamgö osiiga malmam.

16 Ölöwak Buŋa jim sehimakzali, miangöra sileni möpöseimangö dop qahö akzal. Nöŋön Anu-tugö jimkutukutu baŋŋe mala mi jim sehimangö dop akzal. Nup mi mönö mosötmangö osizal. Ölöwak Buŋa qahö jim sehibileŋak ewö, miangöra

* 9:13: Dut 18.1 * 9:14: Mat 10.10; Luk 10.7

lömbötnöŋ qakne öŋgöiga neka pölzik jimeanğö dop akileŋak.

17 Nani sihimnanğö dop nup mi möwölöhöba membilenak ewö, mönö ölop töwa niŋgimegöra mambötpilenak. Mimö, Anutunöŋ kuŋgum niŋgiiga nani sihimni qahö mötöteiba Buŋaŋi galöm kölakzal ewö, mi mönö Anutunöŋ möt narim niŋgiba nupŋi niŋgii maljalanğö dop memakzal. 18 Mewö aiga wanatnöŋ mönö töwa ak niŋgimakza? Ölöwak Buŋa jim sehiba mi söŋgöronji qahö ahakzali, mianön mönö töwa ak niŋgimakza. Anutunöŋ nupŋanğö likepŋi niŋgimegöra jim kutui Buŋa Kimbinöŋ ahözawi, keu mianğö dop töwagöra qahö kapan kölakzal.

19 Ambazip kuŋŋan kun qahö jöhöm niŋgiiga ölop nani imbi-imbi malbilenakmö, mi töndup mönö nani memba et al anğuba maljal. Ambazip körekŋan uruŋini melenmegöra kapan kölakzal. Mewö akŋegöra ambazip körek welennini qeba maljalmö, sehisehiŋi yeŋön töndup Kraistkö buŋaya qahö akŋeanğö dop akze. 20 Juda yeŋön uruŋini melenmegö bauköm eŋgiba sutŋine Juda tandök aka malal. Mosesgö Köna keu bapŋe maljeanön uruŋini melenmegö bauköm eŋgiba nanak Köna keu mianğö bapŋe qahö mala töndup keu mianğö gwaröŋe maljal tandök aka sutŋine malal.

21 Mosesgö Köna keu qahö möta maljeanön uruŋini melenmegöra bauköm eŋgiba sutŋine Köna keu qahö möta maljalanğö tandök aka malal. Nanak Anutugö Köna keugöra tönpin qahö maljalmö, Kraistkö Köna keu bapŋe anda mi tem kölakzal. Mi töndup yeŋgö sutŋine Anutugö Köna

keu qahö mötmöt tandök aka malal. Ambazip sehisehijan uruḡini melenḡmegöra mewö aka malal.

²² Mötnaripnöḡ lölöwöröḡi maljeanḡon uruḡini melenḡda köhöimeḡö bauköm enḡgiba sutḡine lölöwöröḡi tandök aka malal. Ambazip tosatḡi wani awamḡan köna inöḡ me wainöḡ uruḡini melenḡmegö meköm enḡgiba ambazip könaḡi könaḡi yeḡö sutḡine tandök könaḡi könaḡi aka malal.

²³ Tandök pakpak mi Ölöwak Buḡanöḡ sehimapköra aka ahakzal. Sehiiga kötumötuetḡan nani qakne öḡḡöi nanak mewöyök oyaenḡkoyaen akḡamgöra aka mewö ahakzal. ²⁴ Keu ki mönö mötmörime: Ösumtiti nalöḡe körek yeḡön luhut almegöra ösumḡini qezaköba anakzemö, mohot kunḡan mönö luhut ala töwa mema. Inḡini mönö mohot miangö dop ösumḡinan anda töwa memingöra kapaḡ köla malme. Mönö miangö dop mötnarip köl guliba malme.

²⁵ Ambazip mönahotnöḡ luhut albingö anakzei, yeḡön mönö körekḡan nanḡini törörök galöm köl anḡbingö köl gulimakze. Yeḡön kösatorom julkula gororonḡömawi, miyök memingö kapaḡ kölakzemö, neḡön ila jalö qahö ayapkömawi, mönö töwa mi memingö kapaḡ kölakzin. ²⁶ Mianḡöra nöḡön ösumnan laḡlaḡ an köl kam köl qahö anakzal. Böröni misiba bim laḡlaḡ qahö qemakzalmö, aonḡit alaurupni luhut al enḡimamgöra mönö diḡdiḡanök törörök qemakzal.

²⁷ Nöḡön ambazip tosatḡi Buḡa keunöḡ uruḡini kuḡguba malbi teköiga Anutunöḡ mönö andö nunḡui nanak ila jalöḡi qahö membilenḡbuk.

Miangöra mönö nani sileni mindingöba törörök köl guliba galöm kölakzal. Mewö.

10

Israel mutuk malgeri, yeŋgöreŋ galöm meme keu

¹ *O urumelen alaurupni, Israel neŋgö ambösakoninan Mosesgö andöŋe kaba wuatangögetka yuai asuhuyöhi, miangöra mönö gukmaulem malbepuk. Miangöra Israel neŋgö könanini kewö suariba ohozal: Yeŋön mönö körek kousu bapŋe kaba mala Köwet Pisikŋi kutugetka yeŋgöreŋök kunŋan kun qahö ayuhuyök. ² Anutunöŋ o melunŋi kousunöŋ aka köwetnöŋ aliga mi kutuba kaba körekŋan uruŋini melenŋa Mosesgö könagesöŋi aket. ³ *Mewö aka körek yeŋön urugö nene miyöhök miwikŋaiba namba malget.

⁴ *Mewöyök körek yeŋön urugö oŋi miyöhök miwikŋaiba namba malget. Urugö oŋi mi köt ketanŋi kunöŋ enġuatangöba könanŋine kayöhi, mönö miangöreŋök miwikŋaiget. Köt ketanŋi mi Kraistkö söpsöpŋi. ⁵ *Mewö malgetmö, mi töndup Anutunöŋ könagesö ölnŋi mienġöra urusösöŋgai qahö möta maliga gölme qararanġölkölŋe ayuhugetka qamötŋinan qeqelanŋan ahöba gisahöget.

⁶ *Mewö asuhuyöhi, mi nanini kezapqetoknina akza. Anutunöŋ mönö söpsöp mi neŋgöra aka aliga galöm meme keunina kewö akza: Yeŋön uruŋini qahö galöm köla bölöŋangöra köpösöŋgögeri, neŋön

* **10:1:** Eks 13.21-22; 14.22-29 * **10:3:** Eks 16.35 * **10:4:** Eks 17.6; Jan 20.11 * **10:5:** Jan 14.29-30 * **10:6:** Jan 11.4

mönö miangö dop aka ayuhubinbuk. ⁷*Mewöyök Israel yengörenök tosatjan tandö lopionj waiknini memba möpöseiba malgeri, enön mönö miangö dop aka malbepuk. Yengöra Buña Kimbinönj keu kewö ohoget ahöza, “Könagesö yenön nem sösöngai ala tokoba tatketka uruñinan wahöriga mianön melenja kezapjupjup kewö ahök: Yenön linjet gwawet unduba o köhöikni nempa serowilin lañ aket.” Keu mewö ahöza.

⁸*Yengörenök tosatjan serowilin aketka Anutugö irimsesewölnangöra aka ambazip 23.000 miangö dop silim mohotkö uruñe kömumba etket. Neñön mönö tosatji miengö dop serowilin akinbuk. ⁹*Mewöyök Israel yengörenök tosatjan Kembu esapköm wangigetka mokoleñönj engöhögetka kömuget. Neñön mönö tosatji miengö dop Kembu esapköm wangibinbuk. ¹⁰*Yengörenök tosatjan galömurupnini irikuruk jimongot aka andö enguba malgetka mem ayuayuhu garatanönj mönö engui kömuget. Neñön mönö tosatji miengö dop irikuruk jimongot lañ aka malbinbuk.

¹¹ Mewö asuhum engiyöhi, söpsöp keu mi mönö nanini kezapqetoknina akza. Gölmenönj malmalgö nalö teteköñan kam kuñgum neñgii maljini, kösohot mi mönö neñgöra aka ohogetka galöm meme keunina akza. ¹² Miangöra kin köhöimangö jizani, mönö et guhubapuköra galöm mem anguba malman.

¹³ Esapesap qaknine öngömakzei, mi gölme ambazip körek neñgö qaknine öngömakze. Esapesap qainni kun miwikñaiabeak, miangörenj

* **10:7:** Eks 32.6 * **10:8:** Jan 25.1-18 * **10:9:** Jan 21.5-6

* **10:10:** Jan 16.41-49

ösumņinan qahö dop köljawanğöra etpeakmö, Anutunöŋ keuŋi jöhöyöhanğö dop mi pöndaŋ wuatangöba ahakza. Yanön esapesap Tonji anğön köliga esapesap ösumņini qahö dop kölmawanğö dop mi al enğimamğö osimakza. Mewögöra esapesap mötketka Anutunöŋ ösumņi enğiba mewö mianğön ölöŋ kölbingö köna mewöyök mesat enğii asuhumakza. Mianğöra enğön gölmegö esapesapŋi mi ölöp kin köhöiba luhut almeanğö dop akze. Mewö.

Tandö lopionğö lömbuan aka Kembugö semön kömbukŋi

¹⁴ Mianğöra wölböt alaurupni, tosatŋan tandö lopionŋ waikŋini memba möpöseim enğimakzemö, enğön mi kök ala mosötme. ¹⁵ Nöŋön mötmöt ambazip aködamunŋinambuk akzeanğö dopkeu jimami, mi mönö nanŋinak kewöta mianğö ölni mi-wikŋaime.

¹⁶ **“Kembugö semön nene nemin,”* jiba kötümötuetkö qambigöra Anutu saiwap jiba köuluköba qambi mianğöreŋök nemakzinanğöreŋ mönö Kraistköreŋ toroqeba sepŋi nemakzin. Beret mindipköba mianğöreŋök nemakzinanğöreŋ mönö Kraistköreŋ toroqeba busuŋi nemakzin. Mianğöra ölum enğubapuk. ¹⁷ Körek neŋön beret mohot mianğöreŋök nemakzin. Beret mi mohot akzawanğöra aka gwötpuk neŋön mönö Kraistkö ölni mohot akzin.

¹⁸ **Injini mönö Israel könagesögö malmalŋi mötmörime.* Ambazip jöwöwöl ohomegöra nene

* **10:16:** Mat 26.26-28; Mak 14.22-24; Luk 22.19-20 * **10:18:** Lew 7.6

algetka tosatŋan miangö kitipŋi nemakzei, yeŋön mönö altagöreŋ toroqeba nupŋi Anutugöra memakze. ¹⁹ Keu miangö könaŋi ölni mi mönö denöwö jibilenak? Tandö lopion engöra bau qegetka sepŋi eri jöwöwöl ohomakzei, mianön ölnambuk akzawaŋgöra jiza me qahö? Tandö lopion mi ölni akzeawgöra jiza me qahö? Keu miangö könaŋi denöwö?

²⁰ *Tandö lopion mi ölni qahöpmö, urumelengö kopa yeŋön töndup jöwöwölŋini ömewöröme yeŋgöra ala ohomakze. Mi Anutugöra qahö. Nönön inini ömewöröme yembuk toroqeba malbepuköra waimanjat mötzal. ²¹ Inini Kembugö qambinöhök aka ömewöröme yeŋgö qambinöhök öröröŋ nemingö osime. Mewöyök Kembugö nene dum aka ömewöröme yeŋgöreŋ nene dum mi öröröŋ toroqebingö osime. ²² *Ahakmeme mewöŋan mönö Kembugö uruŋi qei böliiga irimŋi seholimapköra mötzin me? Kukösumninan mönö Kembu oŋgita öngöba maljin me?

Nanine imbi-imbis mosöta Kembu möpösebin.

²³ *Tosatŋan kewö jimakze, “Nini ölop nanine imbi-imbis yuai pakpak ahakzin.” Keu mi ölnapmö, ahakmeme pakpak mianön mönö qahö bauköm neŋgimakza. “Nini ölop nanine imbi-imbis yuai pakpak ahakzin,” mewö jimakzemö, ahakmeme pakpaknön mönö urunini qahö naŋgöba mem köhöim neŋgimakza. ²⁴ Kunŋan kun nanŋaŋgörök mötmöröba ölöwakŋangöra kapan kölbapukmö, alaurupŋan ölöwakŋegöra kapan köli dop kölma.

* **10:20:** Dut 32.17 * **10:22:** Dut 32.21 * **10:23:** 1 Kor 6.12

²⁵ Sömbup i me wai maketnöŋ aka qeköm nene mire bohonŋi memegöra alakzei, mi mönö uruyahöt mosöta nemakŋe. Sömbupköra uruŋinan tölöhobapukö qesiŋesinŋi kun mönö kude akŋe. Qahö! ²⁶ *Keu miangö könaŋi mi Buŋa Kimbinöŋ kewö ohoget ahöza, “Gölme aka yuai pakpak miangöreŋ ahözawi, mi Kembangö buŋaya akza.”

²⁷ Kun Kraist qahö möt narizawaŋön engoholiga yaŋöreŋ anbingö möta anda tatketka nene i me wai jeŋine al engimei, mi mönö uruyahöt mosöta neme. Nenegöra uruŋinan tölöhobapukö qesiŋesinŋi mi mönö kude akŋe. Qahö! ²⁸ Nanninaŋgöra qahöpmö, “Nene ki mönö tandö lopionŋ yengö naluk alalŋi akza,” kunöŋ mewö jii mötme ewö, mi jiyöhi, yaŋgöra aka uruŋan bölibapuköra mönö galöm mem anguba kude neme.

²⁹ Nangi urugan tölöhobapuköra qahö jizalmö, alagahö uruŋan bölibapuköra mi jizal. Nöŋön nani imbi-imbi yuai akiga alanangö uruŋan böliiga kewöt niŋgiba Anutunöŋ keuni jim teköba likepŋi meleŋ niŋgibapuk. Öne mewö mendeŋ anginga jabö ahuiga qahö dop kölja. ³⁰ Nöŋön ambazip yembuk toroqeba tata neneninaŋgöra “Anutu pip-saiwap!” jiba sömbup nemami, tosatŋan mewö neka miangöra andö nuŋgugetka qahö dop kölma. Sömbupköra Anutu möpöseizali, miangöra mönö keu töhöreŋ jim niŋgigetka qahö dop kölja.

³¹ Miangöra o me nene nemei aka i me wai akŋei, mi pakpak mönö Anutugö qetbuŋaŋan sehimapköra aka ahakŋe. ³² Yuai kun kude aketka kungö uruŋan miangöra böliiga mötnariŋan

* **10:26:** Sum 24.1

sörörauba etpapuk. Juda me kantri tosatɲaŋgö ambazip me Anutugö könagesö mienḡö sutɲine kungö uruɲan mönö eŋgöra aka bölibapuk. ³³ Nöŋön mewöyök yuai pakpak ahakzali, mianḡöreŋ mönö ambazip körek pakpak uruɲinan ölöwakɲapköra kapaŋ köla maljal. Nanök ölöwakɲamgöra qahö kinjalmö, ambazip sehisehiɲan ölöwakɲegöra jaram tibiga kunbuk letota Suepkö buɲaya akɲegöra kapaŋ kölakzal. Mewö.

11

¹ *Nöŋön Kraistkö silik ewö ahakzali, mianḡö dop eŋön mönö nöŋgö silikni wuatanaḡöba malme. Mewö.

Ambi eŋön mönö nöropɲini esuhuba Kembu möpöseime.

² Nöŋön yuai pakpak ahakzali, iɲini mianḡöreŋ mötmörim niŋgimakzeanaḡöra saiwap jim eŋgizal. Iɲini kusum eŋgialaḡö dopkeuni tem köla wuatanaḡömakzei, mianḡöra mönö möpöseim eŋgizal. ³ Nöŋön iɲini keu ki möt kutumegöra mötzal: Kraistnöŋ azi körek neŋgö bohonini akza. Azinöŋ ambigö bohonɲi akza aiga Anutunöŋ Kraistkö bohonɲi akza. ⁴ Mianḡöra azi iɲini mönö duhuɲini qeköba köuluköba Anutugö keu jigetka dop kölja. Azi körekɲan nöropɲini turuba köuluközei me Anutugö kezapqetok keu jim asarizei, Anutunöŋ mönö yeŋgö mötmötninaḡöra möri gamuɲambuk aiga nanɲini memba et al aɲgumakze.

* **11:1:** 1 Kor 4.16; Fil 3.17

⁵ Mewömö, ambi kunŋan nöröpŋi qahö esuhaba qenjarök totokonöŋ köuluközawi me Anutugö keza-pqetok keu jim asarizawi, yaŋön mönö apŋi nöröpŋi akzawi, mi gamu qeba nanŋi memba et alja. Mewö aka nöröp jupŋi körek mitigetka aukŋe öne maljawanŋö dop akza. ⁶ Ambinöŋ nöröpŋi qahö esuhaba ewö, yaŋön mönö nöröp jupŋi mewöyök jiiga mitigetka dop kölja. Mi dop köljamö, ambinöŋ nöröp jupŋi jiiga mitigetka gamuŋambuk akapuk. Mianŋöra mönö nöröpŋi esuhaba mali dop kölja. ⁷ *Ambinöŋ apŋanŋö aködamunŋi akzajapmö, azinöŋ Anutugö imutŋi aka aködamunŋi akza. Mianŋöra azinöŋ mönö nöröpŋi kude esuhui dop kölma.

⁸ *Mi kewögöra: Mutuhök azinöŋ ambinöhök qahö asuhuyökmö, ambinöŋ azigöreŋök asuhuyök. ⁹ Anutunöŋ azi mi ambigöra qahöpmö, ambi mi azigöra miwikŋaiiga malje. ¹⁰ Kōnaŋi mianŋöra aka ambinöŋ mönö kukösum bapŋe malmalgö ai-wesökŋi mi nöröpŋi esuhaba maliga dop kölja. Mewö aiga Suep garata yeŋön gödaqeŋegö silik ölöpŋi ehakze.

¹¹ Mewö dop köljamö, Kembubuk qekötahöba malinga ambinöŋ mönö azigö keuŋi qahö onŋita nanŋi imbi-imbi laŋ kude malma. Azinöŋ mewöyök ambigö keuŋi qahö onŋita nanŋi imbi-imbi laŋ kude malma. ¹² Ambinöŋ azigö sihitŋeyök asuhuiga mianŋö dop azinöŋ mewöyök ambigö körö uruŋeyök asuhaba maljinmö, öroyuai pakpakö kōnaŋi mi Anutu.

* 11:7: Jen 1.26-27 * 11:8: Jen 2.18-23

¹³ Mianğöra ambinöŋ nöröpŋi qahö esuhuba Anutu köuluköiga dop kölja me qahö? Keu mi mönö nanŋinak kewöta jöhöme. ¹⁴ Anutunöŋ ambazip miwikŋaim neŋgiba gölmenöŋ mohotŋe mal-mal areŋgöyöhi, areŋ mi eka kewöta silik kewöŋi mönö möt asarizin me qahö? Azinöŋ nöröp jupŋi qahö mitiiga köriza ewö, mianjön mönö gamu qem waŋgiza.

¹⁵ Anutunöŋ ambigö nöröp jupŋi köröpŋi mi esuŋi akŋapköra waŋgii malja. Mianğöra ambinöŋ nöröp jupŋi qahö mitiiga köriza ewö, mianjön mönö aködammunŋi ak waŋgiza. ¹⁶ Kunöŋ keu mianğöra goranora akŋamgö mötza ewö, nöŋön mianğöra keu mohok-kun kewö jimam: Anutugö könagesöŋi könagesöŋi Anutu möpöseibingö tokomakzei, yeŋön mönö nembuk urumohot aka silik miyöhök wuatangöba silik tosatŋi tökömakze. Mewö.

Kembugö semön töröŋi nemegö silikŋi

Mat 26.26-29; Mak 14.22-25; Luk 22.14-20

¹⁷ Inŋini urumelenŋ totokonöŋ tokoba mianğöreŋ qahö ölöwahakzemö, mönö toroqeba böliqölimakze. Mianğöra qahö möpöseim eŋgizalmö, areŋ ala jim kutum eŋgizal. ¹⁸ Keu mutukŋi kun kezapne gei kewö möral, “Inŋini urumelenŋ könagesögö totokonöŋ tokomakzei, mianğöreŋ mönö sutŋine aŋgururuk ahakze.” Keu mi jiget möta bahöŋanök ölni akzawi, mewö möt narizal.

¹⁹ Sutŋine deŋda kambu morömorö aketka Anutunöŋ eŋgehiga denike eŋön mötnaripkö esape-sapnöŋ kin köhöize aka denike eŋön qahö dop köljei, keu mianjön mönö aukŋe asuhumakza.

Miangöra uruyahöt qahö mötzal. ²⁰ Urumelen totokonöŋ tokomakzei, miangöreŋ mönö Kembugö semön töröŋi nemingö silikŋi qahö wu-atanömakze.

²¹ Mi kewögöra jizal: Semön töröŋi nemakzei, miangöreŋ öröröŋ qahöpmö, nanŋök nanŋök nenenjini memba könahiba laŋ neget teköiga tosatŋan toroqeba wösöŋini aliga tosatŋan o köhöikŋi gwötpuk memba eŋololon akze. ²² Ahöahö miriŋini ahöm eŋgiza me qahö? Miangöreŋ ölop nene aka o neme. Anutugö urumelen könagesö jijiwilit ak eŋgibingö mötze me ambazip wanapŋi nenenjini qahö mi memba et al eŋgibingö mötze me? Miangöra nöŋön iŋini möpöseim eŋgimangöra mötze me? Mewö qahöpmahöpmö, denöwö jim eŋgibileŋak?

²³ Kembunöŋ keu niŋgiyöhi, nöŋön mönö eŋön mewöyök mi mötmegöra kewö jimam: Kembu Jisös mamalolo mem wanŋigetka sungem miangöreŋ beret meyök. ²⁴ Mi memba kötuetköba saiwap jiba mindipköba kewö jiyök, “Ki nani busuna. Mi eŋgöra aka tököm eŋgizal. Mi memba mönö ni mötmörim niŋgiba malme.” ²⁵ *Mewö jiiga neget teköiga mewöŋanök qambi memba kewö jiyök, “Qambi ki mönö jöhöjöhö dölökŋi akza. Nöŋgö sepni kianöŋ mönö Anutugö jöhöjöhöŋi mem köhöii ahöma. Mi nemakŋeangö dop mönö ni mötmörim niŋgiba malme.”

²⁶ Beret aka qambi miangöreŋök nemakŋei, miangöreŋ mönö nalö dop Kembunöŋ kömuyöhi, miangö buŋaŋi mem asariba mal öŋgögetka

* 11:25: Eks 24.6-8; Jer 31.31-34

lilingöba kaiga teköma. ²⁷ Mianğöra kunñan beret me Kembugö qambi mianğörenök iwilele qakñe nezawi, yañön mönö Kembugö busuñi aka sepñi memba et ala singisöndokñambuk akza. ²⁸ Mianğöra ambazip neñön nanini uruninañgö könañi kewötagun mönö beret aka qambi mianğörenök neinga dop kölma.

²⁹ Kunñan Kembugö busuñi aka sepñi qahö göda qeba nene töhön ewö lañ nezawi, Kembunöñ mönö yañgö keuñi jim teköiga lömböt qakñe öngöma. ³⁰ Lañ nemba malgerañgöra aka ambazip sehisehiñan mönö sutñine löwöriba kawöl miwikñaigetka gwötpukñan lök nöñ qeba kömuget.

³¹ Kömugetmö, nanini urunini kewötpinak ewö, Anutunöñ mönö keunini kewöta jim teköiga lömböt qahö miwikñaibin. ³² Mi qahö miwikñaibinmö, Kembunöñ keunini kewöta jim teköba mewö mönö nalö kewöñe mindiñgöm neñgimakza. Könañgep jim teköm neñgiiga ambazip uruñini qahö melenjeri, yembuk öröröñ könöp sianöñ gebinbuköra mönö mindiñgöm neñgimakza.

³³ Mianğöra urumelenñ alaurupni, nene nemegöra tokomakñei, mianğoreñ mönö nanñinañgöra mamböt añguba öröröñ nemakñe. ³⁴ Kunöñ wösöñi alja ewö, yañön mönö nanñe mire neneñi nema. Tokoba lañ negetka Anutunöñ eñgeka keuñini jim teköi lömböt miwikñaibepuköra mi jizal. Keu tosatñi eñgöreñ kamami, nalö mianğöreñ jim kutum eñgimam. Mewö.

12

Nup memegö mötmöt kalem mienğö könañini

1 O urumelen alaurupni, nõõn Uña Töröñangö mötmöt kalemñi kalemñi mianğö keugöra gukmaulem malbepuköra mötzal. 2 Urumelenğö kopa malgeri, nalö mianğoreñ inöñ me wainöñ enğuanğiriga tandö lopion omani waikñini memba möpöseiba malget. Mewö me mewö janjuñ anda lañ malgeri, mi ölop mötze.

3 Mianğöra inini keu ki mötmegöra jizal: Anutugö Uñañan kun sölölöhöiga “Jisös qesuahözal,” keu mi qahö jiza. Mewöyök Uña Töröñan azi me ambi kun qahö sölölöhöm wañgiza ewö, yañon mönö “Jisösnöñ Kembu ak niñgiza,” keu mi jimangö osiza.

4 *Nup memegö mötmöt kalemñi mi kõnañi kõnañi akzemö, Uña Töröñan mönö mohot akza. 5 Urumelen kõnagesö welen qem enğibingöra nup kõnañi kõnañi memakzinmö, Kembunöñ mönö mohot akza. 6 Welen qem enğibingöra Anutunöñ kukösumñi körek neñğöra menden neñgiiga amqeba köhöiba nup meinga ölni kõnañi kõnañi asuhumakza. Ölni pakpak mi Anutugöreñök kamakzapmö, Anutunöñ mönö mohot akza.

7 Uña Töröñan kõnagesö urunini nañğöi köhöibingöra möta nup memegö mötmöt kalemñi indeliga ölnan mönö mohot mohot neñğoreñ kewö me kewö asuhumakza: 8 Uña Töröñan kungö uruñe geba Anutu nam köliga mötkutukutu keu jijigö kalemñi wañgiza. Uña mohot mianjönök mönö kun sölölöhöiga mötmöt qainñi kun möt yaközawañğö kalemñi buña qem anğuzza.

* 12:4: Rom 12.6-8

⁹ Kunöŋ Uŋa mohot mi qekötahöba mötnaripkö kalemŋi buŋa qem aŋguza. Toroqeba kunöŋ Uŋa Töröŋi miyöhök qekötahöba mem ölö-ölöwakö kalemŋi kalemŋi buŋa qem aŋguza.

¹⁰ Kungöra aŋgöletot memegö ösumŋi waŋgiza. Kungöra Anutugö kezapqetok keu jijigö kalemŋi waŋgiza. Kungöra uŋa aka öme mendenbingö kalemŋi waŋgiiga uŋa ölopŋan me ömewöröme kunöŋ sölölohöiga maljawi, mi ölop kewörakza. Kungöra keuŋi keuŋi qainŋi kun jijigö kalemŋi waŋgiza. Toroqeba kunöŋ keu qainŋi kun jiga kungöra mi melenmapkö kalemŋi waŋgiza.

¹¹ Nup memegö mötmöt kalem pakpak mi Uŋa Töröŋi mohot mianönök mönö sölölohöba möri dop köljawaŋgö dop mendeniga körek neŋön nanjök nanjök buŋa qem aŋguba maljin. Mewö.

Kraistkö ölni mohotmö, kitipurupŋi gwötpuk.

¹² *Silenini mohot akzapmö, töndup miangö uruŋe silegö kitipurupŋi mi gwötpuk akze. Kitipŋi pakpak mi gwötpuk akzemö, töndup mi mindiriba sile mohot akze. Kraistkö ölnan mewöyök mönö miangö dop akza. ¹³ Miangö könaŋi kewö: Uŋa mohotnöŋ mönö körek nini sölölohöba melun mem neŋgiiga Kraistkö ölni mohot akzin. Nini Juda me kantri tosatŋaŋgö toŋi maljini, nanini nupnini memakzini me tonini öne welen qem enjimakzini, mi töndup körek nini mönö Uŋa miyök buŋa qem aŋguŋa urunine geiga möt waŋgizin.

¹⁴ Sileninan mönö sile kitipŋi mohotkö dop qahö akzapmö, miangö uruŋe kitipurupŋi mi gwötpuk akze. ¹⁵ Könaninan kewö jibawak, “Ni böröya

* **12:12:** Rom 12.4-5

qahö. Mianğöra sile qahö toroqeba maljal.” Mewö jibawak ewö, mianğöra mönö tøndup sile mosöta nanñök qahö malbawak. ¹⁶ Kezapninan kewö jibawak, “Ni jeya qahö. Mianğöra sile qahö toroqeba maljal.” Mewö jibawak ewö, mianğöra mönö tøndup sile mosöta nanñök qahö malbawak.

¹⁷ Sileninan jömuk je akawak ewö, keu mötmötkö kezapninan mönö denike tatpawak? Mewöyök jömukñanök kezap akawak, mewö wörön mötmötkö söngöröninan mönö denike tatpawak?

¹⁸ Nanñök nanñök qahöpmö, Anutunöñ sile kitip mohot mohot mi arengöba möri dop köljawanğö dop mindirim enğiiga sile mohot akze. ¹⁹ Sile kitip pakpak mi kitip mohot akeak ewö, mönö denöwö sile mohot akawak? ²⁰ Mewö qahöpmö, sile kitipnini mi gwötpukmö, silenöñ mönö mohok akza.

²¹ Mianğöra jenöñ börögöra kewö jimamğö osiza, “Ni göhöra qahö osizal.” Mewöyök nöropnöñ könagöra “Ni göhöra qahö osizal,” mewö jimamğö osiza. ²² Simbisembel qahöpmö, sile kitipnini möringa lölöwöröñi akzei, mienön qahöwaketka jebuk malbingö osibin. ²³ Sile kitipnini möringa qetbuñanini eretñi akzei, mi mönö esuhuinga qetbuñanambuk akze. Sile kitipnini möringa gamuñinambuk akzei, mi mönö törörök esuhuinga ambazip jeñine dop kölja.

²⁴ Sile kitipnini aukñe kondelbingö gamu qahö mötzini, mi mönö qahö esuhuinga dop kölja. Mewö ahakzinmö, Anutunöñ sile kitipñi kitipñi mindiriba jöhöm enğiba kitipñi omanñi mi qetbuñan ketanñi wanğiiga öröröñ akze. ²⁵ Sile kitip yeñön

sutņine jula aņgururuk akepukmö, tandök mohot köyan köl aņgumegöra mönö areņgöiga öröröņ akze. ²⁶ Sile kitip kunņan sihimbölö mötzawi, tosatņi pakpak mönö yambuk sihimbölö mörakze. Sile kitip kunöņ qetbuņa miwikņai Zawi, tosatņi pakpak mönö yambuk söņgaimakze.

²⁷ Eņön Kraistkö ölni akze aka mohot mohot eņön mönö yaņgö ölnaņgö sile kitipņi akze.

²⁸ *Mi aņgö dop Anutunöņ al eņgiiga urumelen könagesögö nup kewö memakze: Mutuk tosatņi kuņgum eņgiiga melaimelai azi aposol akze. Mi aņgö andöņe kambu yahötņi kuņgum eņgiiga kezapqetok ambazip akze. Kambu karöbutņi yeņön böhi qa qazu akze. Mi aņgö andöņe tosatņan aņgöletot meme ambazip akze. Tosatņi yeņgöra mötmöt kalem eņgiiga kawölņi kawölņi mem ölöwahakze. Tosatņan amqeba köhöiba tosatņi alabauk ak eņgimakze. Tosatņi yeņgöra kalem eņgiiga galömkölköl nup memakze. Tosatņan keu qainņi kun jimakze.

²⁹ Körek eņön mönö melaimelai azi aposol qahö akze. Saumbaņ! Körek eņön mönö kezapqetok ambazip qahö akze. Körek eņön böhi qa qazu akze me qahö? Körek eņön aņgöletot meme ambazip akze me qahö?

³⁰ Kawöl mem ölöwakingö mötmöt kalemņi kalemņi mi körek eņgöreņ ahöza me qahö? Körek eņön mönö keu qainņi kun qahö jimakze. Qahö. Keuņi keuņi qainņi kun jigetka eņön mönö körek mi melenbingö amqeze me qahö?

³¹ Eņön mönö nup memegö mötmöt kalemņi

* 12:28: Ef 4.11

kalemñi ölop sorokñi mi buña qem anğubingöra awöweñgömakñe. Mewö awöweñgögetka nöñön köna qetpuk sorokñi kondela mianğö mötmöt kalemñi mi kewö jim asarimam:

13

Jöpaköm anğuanğugö kalemñi

¹ Nöñön ambazip aka Suep garata yeñgö keuñi keuñi qainñi kun mianñon keu jiba malbilenakmö, urukalemnan qahö asuhuza, mönö töndup kewö akilenak: Gon qegetka gonğon qeri anğötömualñi mörakzini me göjön (biret) uturukögetka kiñqororon qerakzawi, mönö mianğö dop akilenak.

² *Kezapqetok keu jijigö mötmöt kalemñi ahöm niñgiiga keu asa-asambötñi pakpak mötpilenak aka keu pakpakö könañi möt yaköbilenak, mianñon mönö dopñe akza me qahö? Mi töndup urukalemnanğö ölñan qahö asuhuiga mewö mönö yuai omananök aka öne töhön malbilenak. Mötnarip köhöikñi kötökñi miwikñaiba mianğö qakñe kundunğö Toni jim kutubiga ölop tem köla kundunji qeköba kungen albawakmö, urukalemni qahö asuhuza, mewö töndup mönö yuai omananök aka öne töhön malbilenak.

³ Sukinapni pakpak ambazip wanapñi yeñgöra mendenğ engibilenak aka sileni tosatñan ohoget jemapköra tököm engibilenakmö, urukalemnanğö ölñan qahö asuhuza ewö, mianñon mönö qahö kötökñi bauköm niñgima.

⁴ Kunñan alañi uruñan jöpaközawi, yañön mönö urukönöpñi qahöpmö, urubönjöh qakñe ala ak

* 13:2: Mat 17.20; 21.21; Mak 11.23

wanjimakza. Körögisigisi qahö möta yuainjögöra qahö köpösöngömakza. Silenji qahö mem wahöta jakbak-orañborañ qahö malja. ⁵ Ahakmemeñan alañangö urunji qahö mem bölimakza. Nanñi ölöwakñamgörök qahö kapañ kölakza. Uruqeçe ak wanjigetka urukönöp zilañ qahö ahakza. Mem bölim wanjigetka sihimbölo möröhi, mi qahö mötmöriba mosörakza.

⁶ Tosatñan bölöñi akzei, miangöra qahö söngaizapmö, keu ölnji wuatangömakzei, mönö yembuk mohotñe söngaimakza. ⁷ Nalö dop alañi sel jöhöba qöhöröñe kin köhöiba möt narim wanjimakza. Mewö me mewö asuhuiga Anutugö jörömqöröm aka al mamböta awösamkakak kinda sihimbölo pakpak möta mökö söngömakza.

⁸ Urukalem ahakmeme mi nalö teteköñi qahö ahöm öngöma. Kezapqetok keu jiba keunji keunji qainñi kun jimakzei, mianön qahöwakña aka mötmöt qainñi kun mianön mönö mewöyök omani ak teköma. ⁹ Mötmöt qainñi kun mi bahösapsap möt yakömakzin aka kezapqetok keu mi bahösapsap jimakzin. ¹⁰ Bahösapsap ahakzinmö, Anutugö kalemñi kalemñi aködamunñinambuk asuhumei, nalö miangören bahösapsap malmalninan mönö qahöwahiga oyaenköyaen siyoñsayoñi qahö malbin.

¹¹ Nöñön namande malali, nalö miangören namande keu jiba malal. Urumötmötñan namande aiga miangö dopkeu kewöta mötmöriba malal. Azi ketañi aka miangören namandegören ahakmeme mi mosöta andö qeal. ¹² Miangö dop nalö kewöñe Anutugö aködamunñi mi ölop qahö ehakzin. Mi piliknöñ uba ehökö tandök ek bibihiba tandökñi törörök qahö möta öne mötmörimakzin. Mewö

mötmörimakzinmö, könangep Anutubuk mesohol köl anguba ek soroköbin. Nalö kewöñe mötmöt qainñi kun mi bahösapsap möt yaközalmö, nalö mianğoreñ mi mönö körek möt yaköm tekömam. Anutunöñ ni möt kömum niñgizawi, nöñön mianğö dop yanğö könangamñi möt kömum tekömam.

¹³ Keu ki jim köhöizin: Kalem karöbut mötnarip, jörömqöröm aka urukalem mi köhöiba ahöm öngömömö, urukalem ahakmeme mianğön mönö sutñine öngöñgöñi akza. Mewö.

14

Kezapqetok keu aka keu qainñi kun jijigö kalemñi

¹ Urukalemğö könangi mönö wuatangöba malme aka nup memegö mötmöt kalem könangi könangi mi mönö buña qem angubingö kapan köla malme. Mianğön ölöpmö, kezapqetok keu jijigö kalemñi memingöra mönö köhöiba kapan köla malme.

² Kunöñ keu qainñi kun jizawanğön mönö ambazip neñğöra qahöpmö, mönö Anutugörök mi jimakza. Uña Töröñan sölölohöiga keu asa-asambötñi asuhui jimakzawanğöra tosatñi neñön keu mi qahö möt asarim wanğimakzin. Mönö nanñanök bauköm angumakza.

³ Tönpin maljinmö, kezapqetok keu jimakzawanğön mönö ambazip urunini mem köhöiba nangöba urukölalep ak neñgimangöra aka keu jimakza. ⁴ Kunñan keu qainñi kun jiba mianğön mönö nanñi uruñi möhamğöba köhököhöi miwikñaimakzapmö, kezapqetok keu

jimakzawañön mönö urumelenj könagesö pakpak urunini möhamgöba mem köhöim nenjimakza.

⁵ Injini körekñan keu qainñi kun jimegöra mötzalmö, kezapqetok keu jimegöra mönö kapañ köla gwötpuk mötzal. Kezapqetok keu jimakzawañön mönö keu qainñi kun jimakzawi, mi ongitza. Keu qainñi kun jiba mi mianğöreñök nanine keunöñ melenjawı, mewö mönö öröröñ akzahot. Mewö aiga keuñan mönö urumelenj könagesö urunini möhamgöba mem köhöim nenjiiga dop kölja.

⁶ O urumelenj alaurupni, nöñön engöreñ kaba keuñi keuñi qainñi kun jibilenjak, mewö mönö denöwö mem ölöwak enjibilenjak? Mewö qahöpmö, Anutugöreñ keu indelmam me mötmöt qainñi kun enjimam me kezapqetok keu jimam me goro kusum enjimam ewö, mianñön mönö mem ölöwak enjimam.

⁷ Awölop me gita kulele me yuai kunöñ lijetkö imbiñi miwikñaimakzini, mienñön mönö malmalñini qahöpmö, könañini mönö mewöñanök kewö ahöza: Kunñan awölop lañ uba me gita kulele lañ qeiga mianñön qetñini nanñök nanñök qahö miwikñaimakza ewö, lijetkö imbiñi mönö denöwö möt asaribinak? ⁸ Mewöyök tömun um böligetka qetñi törörök qahö möt asarizin ewö, dañön mönö bim qeqegöra jöjöröbawak?

⁹ Engö könañinan mewöñanök ahöza: Nesil-amñinan ambazip qahö möt asarimeangö dopkeu lañ jize ewö, kunñan keu mewöñi mönö denöwö möt asaribawak? Keu mewö jizei, mianñön mönö öne lañ luhutnöñ anakza. ¹⁰ Gölmeñi gölmeñi mianğöreñ keu murutñi murutñi dawik jimakzini,

mi dañön mötpawakmö, töndup körek mienñön mönö keugö könañi möt asaribingöra aka ahöze.

¹¹ Könañi mianğöra aka jimakzinmö, kunöñ keu jiiga keuñangö könañi qahö mötzal ewö, nöñön yangö keuñangö kiannji akiga yañön mewöyök nöngö keuñangö kiani akza. ¹² Engö könañinan mewöñanök ahöza: Inini nup memegö mötmöt kalemñi kalemñi buña qem angubingö awöweñgögetka dop kölja. Mianğöreñ mönö kalem kewöñi membingöra kapañ köla malme: Mötmöt kalem urumelenñ könagesö uruñini möhamgöba mem köhöimakzei, mönö mi buña qem anguba nupnöñ algetka qetpuk akña.

¹³ Mianğöra keu qainñi kun jimakzawañön mönö kewö köuluköiga dop kölma, “O Anutu, keu jizali, mi melenñmangö mötmöt kalemñi niñgiman.”

¹⁴ Mianğö könañi kewö: Nöñön keu qainñi kun jiba köuluközal ewö, nöngö uñanan keuyök jiba köuluközapmö, urumötmötñan mönö ölnji kun qahö miwikñaiza.

¹⁵ Mianğöra mönö denöwö akiga dop kölma? Nöñön mönö uñananöhök qahöpmö, urumötmötñi mewöyök mianğöreñ ala köulukömakñam. Liñet köla möpöseimakzali, mi uñananöhök qahöpmö, urumötmötñi mönö mewöyök mianğöreñ ala kölakñam. ¹⁶ Gi Anutu uñagan möpöseim wañgizan ewö, ambazip omañi kunñan totokoñine kaba tata möpöseizanañgö könañi qahö möt kutumawi, yañön mönö “Keu mi ölnja,” mi denöwö jibawak? Wania jizani, yañön mi qahö möt asariba öne tönpin tatza. ¹⁷ Gi ölop Anutu möpöseizanmö, keugan tosatñi yenğö uruñini qahö möhamgöba

mem köhöim engiza.

¹⁸ Nöñön körek injini engongita keunji keunji qainji kun mi gwötpuk jimakzali, mianğöra Anutu möpöseizal. ¹⁹ Anutu möpöseizalmö, urumelen könagesö uruñe ambazip kusum engimangöra kapañ köla möt asarimeğöra keu jitji 5 jimamgö mötpi ölni akza. Keunji keunji qainji kunöñ keu jitji 10.000 nanangörök jimamgö mötpi eretji akza.

²⁰ Urumelen alaurupni, injini keu kewöta mötmörimakzei, mianğöreñ mönö namande tandök mosöta ambazip ketañi yeñgö dop mötmöriba malme. Bölöñi akin jigetka mianğöreñ mönö morösepsep ewö aka osimemö, mötkutukutuñinan mönö ambazip ketañi aka malme. ²¹ *Mosesgö Köna keunöñ keu kun kewö ohoget ahöza, “Nöñön kian ambazip kuñgum engibiga könagesö kienğöreñ kaba jitñinan keu tandökñi kun jigetka lañ welipkömakñemö, mi töndup nöñgö keuni qahö mötme. Kembu nöñön mewö jizal.”

²² Keu mianğö dopkeu qainji kun jiinga uruñini qahö melenget yeñön mötketka Anutugö aiwesökñi ak engizapmö, mötnarip ambazip neñgöra mianñön mönö aiwesökñi kun qahö akza. Mi qahöpmö, kezapqetok keu jiinga mianñön mötnarip ambazip neñgöra Anutugö aiwesökñi akza. Urumelenğö kopa yeñön mi mötketka Anutugö aiwesökñi kun qahö ak engiza.

²³ Urumelen könagesö eñön tokoba körek eñön keunji keunji qainji kun mianğöreñ jigetka tosatñan

* 14:21: Ais 28.11-12

Buņa keu qahö kusum engigetka uruņini qahö melenđa öne mianğöreņ öngömei, yeņön mönö auruba kewö jibeak me qahö, “Nöröpņinan mönö sohoi kahalalom akze.”

²⁴ Mewö jibeakmö, körek eņön kezapqetok keuņi keuņi jigetka kunņan Buņa keu qahö kusum wanğigetka mötnariņi qahö öne totokoņine öngöma ewö, körek eņön mönö sinğisöndokņi indela uruņi qahö melenňohaņgö keuņi jim tekögetka könaņamņi möt kutuiga aukņe asuhuma. ²⁵ Uruņaņgö keu tölapņi tölapņi aukņe asuhuiga yaņön mönö dapköba eta Anutu waikņi memba möpöseiba kewö jim miwikņaiba qetma, “Anutunöņ ölna engö sutņine malja.” Mewö.

Urumelen totokogö areņi kewö:

²⁶ O urumelen alaurupni, mewögöra nini mönö denöwö jiinga dop kölma? Inini Buņa keugö tokomakņei, mianğöreņ mohot mohot eņön mönö körek areņini kun me kun mi kewö ahakņe: Kunöņ Buņa liņetkö areņi aliga kunöņ Buņa keu kusum eņgiiga kunöņ Anutugö goro dölöknı indeliga kunöņ keu qainņi kun jiiga kunöņ mi melenma. Areņ pakpak mi mönö urumelen könagesö urunini kunğuet köhöibingöra aka ahakņe.

²⁷ Tosatņan keu qainņi kun jime ewö, ambazip 4 qahöpmö, yahöt me karöbut yeņönök mönö totoko mohotkö uruņe mewö jime. Yeņönök mönö areņinaņgö dop awataņ jigetka kunņan mi melenma. ²⁸ Kunņan keu melenmamgö dop qahö akza ewö, yeņön mönö urumelen könagesögö totokonöņ keu bök tata nanņinaņgörök keuņini qainņi kun jigetka Anutunöņ mötma.

²⁹ Kezapqetok ambazip yeŋgöreŋök yahöt me karöbut yeŋgörök mönö areŋ eŋgigetka keu jigetka tosatŋan mönö keuŋini kewötme.

³⁰ Mewö akŋemö, kunŋan totokonöŋ tariga Anutunöŋ goro keu uruŋe indeli mötza ewö, yaŋön mönö mi jiiga kezapqetok keu mutuk jizawaŋön keuŋi mosöta bök tatma. ³¹ Ambazip körekŋan Anutugö goronji mötketka uruŋini nangöi ölöwakŋegöra iŋini mönö körek pakpak ölop nalöŋini memba areŋinaŋgö dop kezapqetok keu jime. ³² Kezapqetok ambazip yeŋön mönö ölop uŋaŋini galöm kölgetka uŋaŋinan keu bapŋe anjeaŋgö dop akze.

³³ Anutunöŋ kizik-kazuk Tonji qahöpmö, luai Tonji akza. Miangöra totokonini mönö areŋnöŋ wuatangöba ahakŋe. Ambazip sarakŋi yeŋgö sutŋine könagesö dop ahakzei, iŋini mewöyök mönö miangö dop kewö ahakŋe: ³⁴ Ambi eŋön mönö urumelen könagesögö totokonine keu bök tatme. Yeŋön keu jimeaŋgö dop qahö akzemö, Köna keu ahözawaŋgö dop mönö keu bapŋe anda malme.

³⁵ Ambinöŋ urumelen könagesögö keu jim kutuba kusum eŋgiiga qahö dop kölja. Miangöra keu kungö könani mötpingö mötze ewö, yeŋön mönö miriŋine anda tata nanŋini apurupŋini qesim eŋgime.

³⁶ Anutugöreŋ Buŋa keu mianön mönö eŋgö sutŋineyök ahuyök me qahö? Keu mianön ahuba sehiba mala eŋgöreŋ kaba eŋgö buŋayök akza me qahö? ³⁷ Kunöŋ kewö jibawak, “Nöŋön kezapqetok keu jibiga Uŋa Töröŋan sölölohöm niŋgiiga keu miambuk urumohot qahö akzal.” Mewö jizawaŋön

mönö keu ki möt yaköma: Nöñön ambigöra keu ohom enğizali, mianjön mönö Kembugö jöjöpañ keu akza. ³⁸ Kunñan keu mianğö kezap qahö ala silebile malja ewö, injini mönö azi yangö keugö kude kezap al wañgiba malme.

³⁹ Mianğöra urumelen alaurupni, injini mönö kezapqetok keu jibingöra awöweñgöba malme aka keu qainñi kun jimegö songonji mi kude alme. ⁴⁰ Mi kude almemo, yuai pakpak mönö törörök aren al wuatangöba ahakñe. Mewö.

15

Kraistnöñ kömupnöhök wahörök.

¹ O urumelen alaurupni, nöñön Ölöwak Buña jim asarim enğiali, mi ölum enğubapuköra mönö köl gulim enğimam. Injini mi buña qem anğuba mötnaripñini mianğoreñ ala töndangöba kinje.

² Nöñön Ölöwak Buña jim asarim enğiali, injini mi mianğö dop töp memba anğön kölme ewö, mianjön mönö mem letot enğiiga Suepkö buñaya akñe. Mewö qahö akñe ewö, urunini mönö öne töhön melen da malje.

³ *Nöñön keu tosatñi pakpak görañe ala nanak Buña keu möt anğön kölali, mi mötpi öngöiga mianğö keu kötni mötmegöra mi kewö enğial: Kraistnöñ mönö Buña Kimbi ahözawangö dop neñgö siñgisöndokninañgöra aka kömuyök.

⁴ *Kömuiga Buña Kimbi ahözawangö dop löm kölgetka sömañi karöbut aiga kömupnöhök

* 15:3: Ais 53.5-12 * 15:4: Sum 16.8-10; Mat 12.40; Apo 2.24-32

wahörök. ⁵ *Kömupnöhök wahöta Pitögöreñ asuhuyök aka miangö andöñe gwarekurupñi 12 yeñgöreñ asuhuyök.

⁶ Miangö andöñe nalö mohot miangöreñök urumelen alaurupnini qötöñini 500 oñgiröhi, mönö yeñgöreñ asuhuyök. Yeñgöreñök ambazip ölni yeñön toroqeba nalö kewöñe mewöyök maljemö, tosatñan lök kömuget. ⁷ Miangö andöñe munñi Jeimsgöreñ asuhuyök aka miangö andöñe aposol pakpak yeñgöreñ asuhuyök.

⁸ *Miengöreñ körek asuhubagun qöndökñi mönö nöñgöreñ mewöyök asuhuyök. Nöñön aposol mi asai ewö öröpköba alunñi asuhuyal.

⁹ *Miangö könañi kewö: Nöñön aposol yeñgö sutñine mötpi eriga dagibezupñini akzal. Anutugö urumelen könagesö sesewerowero ak engiba malali, miangöra nöñgö qetni aposol qetketka mötpi gamuñambuk akza.

¹⁰ Gamuñambuk akzapmö, nalö kewöñe yuai akzali, mi mönö Anutugö kalem möriamñan mem letota nam köl niñgiiga maljal. Yañön kalem möriamñi niñgiiga liklak qahö akiga eta qeba omani qahö ahökmö, nöñön mönö aposol körek luhut al engiba köhöiba nup memba malal. Mi nanak qahöpmö, Anutugö kalem möriamñan mönö inahöm niñgiiga nupnañgö ölni mewö asuhuba sehiyök.

¹¹ Nöñön meali me yeñön megetka ölni asuhuyöhi, mi muat. Neñön mönö Ölöwak Buña

* 15:5: Mat 28.16-17; Mak 16.14; Luk 24.34, 36; Jon 20.19 * 15:8:

Apo 9.3-6 * 15:9: Apo 8.3

keu mewö jim asarimakzin aka injini mianğö dop uruñini melenđa Kraist möt nariba malje. Mewö.

Nini kômupnöhök denöwö guliba wahötpin?

¹² Mötket! Kraistnön guliba kômupnöhök wahöröhi, yangö könañi mewö jim asarimakzin ewö, engörenök tosatñan mönö denöwö aka kewö jimakze, “Kömukömuñi yeñön qahö guliba wahötme.” ¹³ Mewö jimakzemö, kômukömuñi yeñön qahö guliba wahötpeak ewö, Kraistnön mönö mewöyök qahö guliba mal köhöibawak. ¹⁴ Anutunön Kraist qahö mem guli kômupnöhök wahötpawak ewö, nini Buña keuñi mi jim asarimakzini mi omañi akawak. Mi möt narigetka mianjön mewöyök pömsöm qeba omañi akawak.

¹⁵ Anutunön ölña kômukömuñi qahö mem gulim engii wahötpeak ewö, Kraistnön mönö mewöyök qahö mem guli wahötpawak. Nini mi töndup Anutugö könañi kewö nanğöba jimakzin, “Anutunön mönö Kraist mem guli kômupnöhök wahörök.” Keu mi ölñi qahö akawak, ambazipnön mönö mianğöra aka könañamnini miwikñaigetka muneñi aiga ölop nöngöra kewö jibeak, “Anutugö könañi mönö nanğöba jim sohomakza.” Keu mianjön mönö gamuñamñuk akawak. ¹⁶ Anutunön kômukömuñi qahö mem gulim engii wahötme ewö, Kraistnön mönö mewöñanök qahö guliba wahötpawak.

¹⁷ Anutunön Kraist qahö mem guli wahötpawak ewö, injini mönö öne töhöntöhön möt narim wangiba toroqeba singisöndokñinangö kösögwarönön malbeak. ¹⁸ Mewö aiga alaurupninan Kraistpuk qekötahöba kômugeri,

yeñön mönö mewöyök sohoba könöp siagö buñaya akeak. ¹⁹ Nini Kraist jörömqöröm ak wañgiba gölmenöñ malbinanğö dop galöm köl neñgii miangören tekömapköra mambötzin ewö, nini mönö ambazip tosatñi pakpak enğonğita bapñine geba öngöpñi daböñi malinga körekñan wösö mötmöt ak neñgimakzeanğö dop akinak.

²⁰ Mewö akinakmö, Kraistnöñ mönö ölña guliba kömukömuñi yengö jitñe memenini aka kömupnöhök wahörök. ²¹ Miangö könanñ kewö: Azinöñ kömup kondoriga asuhui könahiba kömumba mala korin. Kömumba maljinanğöra aka azi kunñan kömumba guliba malmal köhöikñi kondoriga asuhuyök. Miangöra nini körekñan mönö mewöyök guliba kömupnöhök wahötpin. ²² Körek neñön Adam ewö aka kömumbini, mewöñanök Kraistpuk qekötahözini, Anutunöñ nini körek mal köhöibingöra mem gulim neñgima.

²³ Mem gulim neñgimapmö, körek neñön mönö Anutunöñ nalö alöhanğö dop guliba wahötpin. Kraistnöñ jitñememenini aka guliiga miangö andöñe yanğö buñanñi akzini, neñön lilingöba kaiga nalö miangören guliba wahötpin. ²⁴ Kraistnöñ mönö lilingöba kaba ömewöröme pakpak gölme dop ösum-mumu çakñe galöm kölakzei, miengö kukñini memba et ala ösumñini körek köndenma. Mi köndennda bemtohoñi Anutu Iwigö böröñe aliga gölmenöñ malmal miangören teköma.

²⁵ *Kraistnöñ galöm köla mal öngöiga Anutunöñ Buña keu ahözawanğö dop “mönö kerökurupñi körek luhut ala nanñi köna bapñe al enğima.”

* 15:25: Sum 110.1

Kraistkö galömkölköl nupņan mōnō miangōreņ tekōma. ²⁶ Kerōkurupņi luhut al enņiiga miangōreņ kōmup Toņan mōnō qōndōkņi aiga memba et al waņgima.

²⁷ *Miangō kōnaņi mi Buņa Kimbinōņ kewō ahōza, “Anutunōņ mōnō yuai pakpak yaņgō kōna bapņe ali ahōza.” Keu mewō ahōzapmō, “Yuai pakpak ali ahōza,” keu mewō jiiga kōnaņi mōnō aukņe kewō ahōza: Anutunōņ yuai pakpak Kraistkö bapņe ali ahōiga nanņi mōnō qahō memba eta Kraistkö bapņe al aņguyōk. ²⁸ Mewō qahōpmō, Anutunōņ yuai pakpak Nahōnņangō bapņe aliga galōm kōla kerōkurupņi pakpak nanņi kukōsumņangō bapņe al enņgima. Mi tekōiga miangōreņ Anutunōņ mōnō Nahōnņi mewōyōk nanņi kukōsumņangō bapņe ala galōm kōl waņgima. Mewō aka Anutunōņ yuai pakpakō Kembuņi ak tekōba mal ōņgōma.

²⁹ Keu kun kewō: Ambazip tosatņan uruņini qahō melenđa ōne kōmugerangōra tosatņan kōmukōmuņi mi baukōm enņgimegōra jiba salupņini aketka dumņe kunbuk o melun mem enņgimakze. Kōmukōmuņi yeņōn qahō guliba wahōtpeak ewō, yeņgō nup ōlņan mōnō denōwō asuhubawak? Anutunōņ kōmugeri, mi qahōpmahōp mem gulim enņgi wahōtpeak ewō, ambazip mewōņan mōnō denōwōgōra aka jigetka yeņgō salupņine o melun mem enņgimakze? Nupņini mi mōnō ōne membepuk.

³⁰ Kōmumba qahō wahōtpinak ewō, neņōn mewōyōk mōnō urunini Anutugō nupnōņ qahō

* 15:27: Sum 8.6

ala jöhöbinak. Anutugö nupköra aka kömumbinbukö lömböt bapņe sundan qahö anda malbinak. Qahö.

³¹ Kömupnön mönö nalö dop gwahöt ningimangö dop akza. Keu mi ölna. O urumelen alaurupni, nöņön Kraist Jisös Kembunini yambuk kinda engöra aka sileni memba öngömakzali, mianğö dop-keu ölni mi aukņe jibi mötmegöra mötzal.

³² *Nani imbi-imbi wuatangöba nup ki memangö mötmörize ewö, yuai kianğön mönö denöwö bauköm ningima? Mewö qesim engibiga mi mönö mötmöriba melenme: Nöņön Efesus siti kianğoreņ ambazip ubibi kanjamņinambuk ewö miwikņaiaba kömumbilenbuköra yembuk auba malal. Mönö tötböröm aka auba malal. Kömumbagun qahö guliba wahötpini, mewö mönö qahö aubilenjak. Qahö! Mewö aiga ölop tosatņi yembuk kewö jibileņak, “Uran kömumbinağöra mönö ölop nene sösöngai ala o köhöikņi namba malbin.”

³³ Janņun kude akņe. “Ambazip bölöņi yembuk köisirik tatketka ahakmeme ölopņan bölima.” Keu kun mewö ahöza. ³⁴ Engö sutņine tosatņan Anutu qahö möt wangizei, mianğöra gamuņini mötmegöra mi jizal. Mianğöra mönö gukmaulemņini mosötme. Imbiņinan letoriga törörök möta siņgisöndok kude toroqeba ahakņe. Mewö.

Sileninan guliba wahöta tandökņi kun akņa.

³⁵ Kunöņ kewö qesibawak, “Anutunöņ kömukömuņi mi denöwö mem gulim engii wahötme? Sileninan mönö tandök denöwö melenņiga asuhume?” ³⁶ Mewö qesibawak, mönö

* 15:32: Ais 22.13

uruqahö keuya jibawak. Inini sehoŋ kötni qahö kömuiga öne qesiŋ gilme ewö, mianjon mönö qahö jula wahötma. ³⁷ Kötnaŋgö ipŋi wahötmawi, mi qahö kömötzanmö, kötnanök qesiŋ giljan. Wit me sehoŋ kötni me kötni tosatŋi gilakzan.

³⁸ Miyök gilakzanmö, Anutunöŋ mönö sihimnaŋgö dop ipŋi waŋgima. Kötni tandökŋi nanjök nanjök mi nanjini ipŋi eŋgimakza.

³⁹ Yuai busuŋini mi tandökŋini mohot qahö. Ambazip busuŋini nanjök, sömbup busuŋini nanjök, nei busuŋini nanjök aka söra busuŋini mi nanjök.

⁴⁰ Miangö dop Suepnöŋ malmalgö sile mi nanjök akza aka gölmenöŋ malmalgö sile mi nanjök akza. Nanjök nanjök akzahotmö, Suep silegö aködamunŋi mi gölme silegö aködamunŋi oŋgita qainŋi kun akza. ⁴¹ Wehöngö asakmararaŋi mi nanjök, köiŋgö asakmararaŋi nanjök aka seŋgelau miengö asakmararaŋini mi nanjök. Seŋgelau asarigetka tosatŋi miengö asakmararaŋini mi seŋgelau tosatŋi miengö asakmararaŋini oŋgirakza.

⁴² Guliba kömupnöhök wahötpini, miangö könaŋan mönö miangö dop ahöza. Sile löm kölbini, mianjon gisahöba qahöwakŋapmö, Anutunöŋ mi mem gulli wahötmawi, mianjon mönö qahö kömuma. ⁴³ Sile löm kölbini, mianjon lölöwöröŋi aködamunŋi qahö akzapmö, Anutunöŋ mi mem gulli wahöta miangöreŋ mönö köhöikŋi aka asakmararaŋambuk akŋa.

⁴⁴ Sile löm kölbini, mianjon gölmenöŋ malmalgö sileya akzapmö, Anutunöŋ mi mem gulli wahöta miangöreŋ mönö uŋa mire malmalgö sileya akŋa.

Gölmegö sile ahöza ewö, mianğö dop uñagö silenji mi mewöyök ahöza. ⁴⁵ *Mianğö keunji mi Buña Kimbinöñ mewöyök kewö ohoget ahöza, “Azi mutukñi Adam yanön letota uñanji miwikñaiiba söngörö ösumñi öröba malmalñambuk ahök.” Keu mi möringa likepñi kewö asuhuyök: Adam qöndökñan mönö memguliguligö uñanji ahök. ⁴⁶ Uñagö yuainji mi mutuk qahö asuhuyökmö, gölmegö yuainji mianön mönö mutukñi akza. Uñagö yuainjan mönö mianğö andöñe asuhuyök.

⁴⁷ Anutunöñ azi mutukñi sömsömnöhök miwikñaiiga gölme azia asuhuyök. Azi könangepñi yanön mönö Suepnöhök eta sutnine asuhuyök.

⁴⁸ Gölme ambazipnöñ azi gölmenöhök asuhuyöhi, mönö yangö dop akze. Suepkö buña akzinañön azi Suepnöhök eta asuhuyöhi, mönö yangö dop akzin. ⁴⁹ Nini gölme azi mutukñangö kaisongolomñi memba maljini, mianğö dop Suep azigö kaisongolomñi mi mewöyök memba malbin. Mewö.

⁵⁰ O urumelenj alaurupni, nöñön keu kewö jibi mötme: Sep busuninan mönö Anutugö bemtohon uruñe angota dum memegö dop qahö. Mi osimahot. Sile kianön gisahöba qahöwakñawi, mianön mönö oyaenköyaen qahö akña. Suepkö dum qahö ayapkömawi, sile kianön mönö mi memangö osima.

⁵¹ *Mötket! Nöñön keu tölapñi kun kewö indelmam: Körek neñön mönö qahö nöñ qeba kömumbin. Qahöpmö, kömukömuñi yeñön letotketka tosotñi neñön mönö sileninambuk

* 15:45: Jen 2.7 * 15:51: 1 Tes 4.15-17

letotpin. ⁵² Anutunöŋ kömukömuŋi mem gulim enŋiiga tömun qainŋi kun qöndökŋan qeriga mianŋöreŋ wahötketka neŋön biliksik aliga wölaŋök letotpin. Mutuk kömugeri, yeŋön mönö kunbuk qahö kömume.

⁵³ Sep busu ki gisahöba qahöwakŋawi, mianŋön mönö letota qahö ayapkömawanŋö dop akŋa. Sile ki kömumawi, Anutunöŋ mi mönö opo ewö qeköba mianŋö salupŋe sile qahö kömumawi, mi neŋgii memba maluku ewö löŋötpin.

⁵⁴ *Mewö akzapmö, letotletot mi ak teköiga silenini qainŋi kun meinga qahö kömumba gisahömawi, nalö mianŋöreŋ mönö söŋgaibin. Buŋa Kimbinöŋ keu ohoget ahözawi, mianŋön mönö öŋjambuk aiga mianŋö dop kewö jime, “Yaŋön mönö kömup Toŋi köndenŋa luhut aliga köiran aljin.”

⁵⁵ *Keu mianŋö alaŋi kun kewö, “O kömup Toŋi, göŋön mönö luhut almananŋö dop qahö. O kömup Toŋi, göhöreŋ liŋgip jitŋi mianŋön mönö neŋgöhömangö osima.”

⁵⁶ Keu mewö ahözapmö, kömupkö liŋgip jitŋi mi siŋgisöndok ahakmeme. Jöjöpaŋ keuŋan mönö siŋgisöndok akinbukö soŋgo aliga töndup ahinga kukŋambuk ahakza. ⁵⁷ Kukŋambuk ahakzapmö, Kembunini Jisös Kraistnöŋ mönö Anutugöreŋ bohon köliga alabauknini aiga yanŋöra aka luhut ala malbin. Mianŋöra “Anutu saiwap!” jizal.

⁵⁸ O wölböt alaurupni, luhut albinanŋöra eŋön mönö kin köhöiba anjanbanjan mosöta uruŋini kude öŋgöba eta ahakŋa. Kembangöreŋ qekötahöba

* 15:54: Ais 25.8 * 15:55: Hos 13.14

nupɲi megetka ölnan mönö eta omanɲi qahö akɲa. Mi möt yaköba Kembangö nupɲi mi mönö urukönöp* qakɲe böɲ qeba pöndaɲ memba malme. Mewö.

16

Jerusalem alabauk engimegö jimkutukutuɲi

¹ *Judia könagesö sarakɲi yengöra alabauk monenɲ tokomegöra qesim niɲgigeri, miangöra kewö jim kutum engizal: Nöɲön Galesia prowinsgö urumelenɲ könagesöɲi könagesöɲi jim kutum engiali, enön tok mönö miangö dop kewö ahakɲe:

² Sonda dop wehön mutukɲi miangörenɲ inini körek nanɲök nanɲök mönö naluk alakɲe. Töhötmöriam memakzeangö dop monenɲini bahöɲi mi köwenɲini göraɲe ala galöm köla malme. Mewö aketka nalö engörenɲ kabiga miangörenɲ naluk sangabaɲga almeangö dop qahö akɲemö, mi ölop köwenɲineyök memba altanöɲ alme.

³ Mewö aketka engörenɲ kamami, nöɲön nalö miangörenɲ ölop jim-asa-asari kimbi ohoba azi nup miangö mötket dop köljawi, mönö yengö böröɲine ala melaim engibiga mindimindiri kalemɲini mi memba Jerusalem anme. ⁴ Nöɲön yembuk mohotɲe anmangö anmam ewö, yeɲön mönö ölop nömbuk toroqeba mohotɲe köwet kutuba anbin. Mewö.

Polgö nupɲangö aka köna anangö arenɲi

* **15:58:** Urukönöp mi Kembangörenɲ ölopɲangöra jiza. Urukönöp bölöɲi mi qahö. * **16:1:** Rom 15.25-26

⁵ *Nöñön Masedonia prowins onğita anmam. Miangöra Masedonia mosötagun mönö engören kamamgö mötzal. ⁶ Engören kaba nalö tosatñi embuk tatpileñak me kömunjañ kie nalöñi (winter) mi mewöyök engö sutñine toroqeba mal teköbilenak. Mewö malbi ölop bauköm niñgigetka denike denike anbilenak, miangören mönö amqeba köna toroqeba anmam. ⁷ Nalö kewöñe engören kaba kusukñanök engeka engonğita anmamgö qahö mötzalmö, Kembunöñ on jima ewö, mönö nalö tosatñi embuk tatmamgö jöjörözal.

⁸ **Mewö jöjörözalmö, mutuk Efesus siti kiangören toroqeba malbi yambu jeniqeçe dölökñi (pentekost) miangön kam kuñguma. ⁹ Anutunöñ nöngöra nupkö nanğunji ketanji öröi ölop nup ketanji membi ölnji asuhum sehimakzapmö, gwötpukñan tuarenjon ak niñgimakze. Miangöra kiangören toroqeba malmamgö mötzal.

¹⁰ *Timotinöñ ni ewö Kembangö azi ipñi aka nupñi memba malja. Miangöra yanön engören kama ewö, inini mönö köyan köl wanğigetka kenğöt mötmötñi qahö engö sutñine malma. ¹¹ Kunñan kun kude ek sirik kölmapmö, embuk mal teköba nöngören kamamgö jimawi, miangören mönö bauköm wanğigetka luainöñ engömosöta lilingöba kama. Nöñön urumelen alaurup yembuk i ekingö mambötzin.

¹² Urumelen alanini Apolos yanğö keunji kewö jimam: Yanön urumelen alaurup yembuk engören

* 16:5: Apo 19.21 * 16:8: Lew 23.15-21; Dut 16.9-11 * 16:8: Apo 19.8-10 * 16:10: 1 Kor 4.17

kamegöra jiba köhöikṅanök uru kuṅgum waṅgial. Mi waṅgialmö, nalö kewöṅe engöreṅ kamangö tököm köhöiza. Könaṅgep nalöṅi ölop ahöm waṅgimawi, mönö miangöreṅ kama. Mewö.

Yaizözkök keu teteköṅi

¹³ Inini mönö uruguliguli mala mötnaripṅini köl guliba kin köhöiba malme. Azi köhöikṅanögö dop mönö urugö naṅgönaṅgö ambazip aka Kembugö kukösumṅambuk kinme. ¹⁴ Yuai pakpak aka memei, mi mönö urukalemnöṅ aketka asuhuma.

¹⁵ *Stefanas yaṅgö mire maljei, inini mi möt engize. Akaia prowinsnöṅ nup meinga uruṅini melengetka nupninaṅgö ölni mutukṅi mewö asuhuyöhi, mötze. Yeṅön ambazip sarakṅi mi pöndaṅ welen qem engiba uruṅini miangöreṅ jöhöba ala maljei, mi mötze. O urumelen alaurupni, nöṅön uruṅini kewö kuṅgum engizal: ¹⁶ Inini tok ambazip mewöṅi aka yembuk toroqeba nup mohotṅe memba Anutu welenni qemakzei, mönö körek yeṅgö keuṅini bapṅe anda malme.

¹⁷ Nöṅön Stefanus Fortunatus aka Akaikus ki kageraṅgöra söṅgaimakzal. Inini nömbuk Efesus ki qahö malgetka yeṅön mönö engö salupṅini aka köisirik ak niṅgigetka dop kölja. ¹⁸ Yeṅön engö uṅaṅini körö-ölöwak qeba maljei, miangö dop mönö nöṅgö uṅani mewöyök körö-ölöwak qem niṅgiba malget. Miangöra inini mönö azi mewöṅi yeṅgöra mötket öṅgöiga mi aukṅeyök jiba keuṅinaṅgöra törörök kezap ala malme.

* 16:15: 1 Kor 1.16

19 *Urumelen könagesöni könagesöni Eisia prowins kiangörej maljei, yeñön mönö yaizözkökñini algetka engörej kaza. Aqila Prisila aka urumelen könagesö yetkö mire tokomakzei, yeñön mönö Kembugö qetne yaizözkökñini gwötpuk algetka engörej kaza. ²⁰ Urumelen alaurup pakpak Efesus ki maljei, yeñön mönö yaizözkökñini algetka engörej kaza. Inini mönö urumelen alaurupñini yembuk jölöñini jiba angum anguba numbuñini yöhötüm namba malme.

²¹ Nani yaizözkökni engörej ala qetni nani börönan kewö ohozal: Pol.

²² Kunñan Kembu qahö jöpaköba urukalem qahö aka malja ewö, Kembunöñ mönö qesuakñi yangö qakne ali öngöma. Kembunini, gi mönö kanöñ!

²³ Kembu Jisösgö kalem möriamñan mönö embuk ahöma.

²⁴ Kraist Jisösbuk gekötahöba kinjei, nöngö urujöpaknan mönö körek embuk ahöba kötuetköm enji malme. Keu mi öñja. Mewö.

* 16:19: Apo 18.2

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 3 Mar 2023 from source files dated 9 Oct 2020

c0871260-68cc-5a50-953f-52200e105d1e